

古今治平畧

古今治平畧卷之二十七

豫章

弟

桐溪

鍾名臣鼎楊父較

美父訂

強陵諸國

兵制篇下

歷代任將

人主之權無所不御而有時乎不御。人臣之義無所
敢專而有時乎專。則惟將爲然矣。且夫三軍國之太
阿而持以予人。顧何可以不御哉。蓋賢主之任人疑

則弗用。用則弗疑。而况軍旅生民之司命。國家安危之所關。矜之愈重。則任之宜益專。任之益專。則縱之宜益甚。此將軍之時也。胡可制也。時不可制。則吾以縱爲御。縱不可常。則必有所以制之者在矣。然則將兵之權。常在將而將將之權。常在君所御大。而所不御者。小故。主將一心。而三軍齊力。勝不亦宜乎。世之爲君謀者。曰持大兵者。如持盤水。正傾在俯仰。一致蹉跌。求止不得。奈何。其弗慮之。且兵卒多。則有弱幹之患。張弛擅則有尾大之虞。勲名盛。則憂其難制。統

轄久則懼其難收。刀閒之愛貴奴也。舉其資與之以
求什一之利。則持籌而計之。必使盈縮在手。而後能
使豪奴自饒。而盡其力。况捐千百萬之衆。而出之千
百里之外。而無可御哉。故爲君謀者。其說常在于御。
爲將謀者。則不然。曰。將貴專威。兵貴合變。握三軍之
號令。而受命于中。制則不威。制一時之利害。而計定
于千里。則失變。故明君必假之以建威之勢。而與之
以制變之宜。世主不達斯義。一切以鈐制束縛之術
施之。此忠臣志士所爲扼腕而太息也。御之亦何益。

哉故爲將謀者其說常在于不御然則爲之奈何孫
子固曰將能而君不御者勝非謂凡將皆當不御而
凡不御者皆勝也明主之權未嘗不予人而未嘗不
重予人予其所能者而靳予其所不能者則御將之
道已夫能豈易言哉衝陷折關者槩之沉毅或不足
不可謂能智畧輻輳者程之勇斷或不給不可謂能
智勇出衆者本之忠義或不固不可謂能何者其材
有所偏而其志有所可奪也故夫任將者試之以五
材律之以五慎觀之以十過稽之以八証而將果能

矣。于是有避殿之召。有告廟之儀。有登壇之拜。有分
闡之任。凡以爲能將尊也。搦斧而授之柄。曰。從此上
至天者。將軍制之。搦鉞而授之刃。曰。從此下至淵者。
將軍制之。凡以爲能將專也。是故戰守異用。不撓其
機。衆寡異宜。不制其數。遲速異效。不責其期。會資賞
異施。不問其出入。毋以盈庭之議。而間帷幄之密謀。
毋以懸億之言。而淆當機之定算。凡以爲能將寬也。
輦鼓金鐸。聽有所不聞。而非壅也。懼多言之亂聽也。
旌旗麾幟。明有所不見。而非蔽也。懼多指之亂視也。

凡以爲能將信也。如是故將權一。將權一故上足仰。上足仰故下可用。是故無天于上。無地于下。無君于後。無敵于前。萬物至而制之。萬物至而命之。惟吾所裁。而他無所顧慮焉。是以將無疑謀。卒無二心。口無還令。事無嘗試。師一出而四夷懾。白刃不畢拔而天下服也。人見其圖利無疆。康正八極。以爲將之功如是。而不知君固有以縱之。人見君之縱之如是。而不知將之能固。有以當之也。昔者武王問太公曰。吾欲三軍之衆。攻城爭先。登野戰爭先。赴聞金聲而怒。聞

鼓聲而喜爲之奈何太公曰將有三勝武王曰敢問其目太公曰將冬不服裘夏不操扇雨不張蓋名曰禮將將不身服禮無以知士卒之寒暑出隘塞犯泥塗將必先下步名曰力將將不身服力無以知士卒之勞苦軍皆卽次將乃就舍炊者皆成將方就食軍不舉火將亦不舉名曰止欲將將不身服止欲無以知士卒之饑飽將與士卒共寒暑勞苦饑飽故三軍之衆聞鼓聲則喜聞金聲則怒高城深池矢石繁下士爭先登白刃始合士爭先赴士非好死而樂傷也

爲其將知寒暑饑飽之審而見勞逸之明也不知戰
攻之策不可以語敵不能分移不可以語奇不通治
亂不可以語變故曰將不仁則三軍不親將不勇則
三軍不銳將不智則三軍大疑將不明則三軍大傾
將不精微則三軍失其機將不常戒則三軍失其備
將不強力則三軍失其職將自十人以上有戰而北
守而降離地逃軍命曰國賊身戮家殘去其籍男女
公于官自百人以上有戰而北守而降離地逃衆命
曰軍賊身死家殘男女公于官使民內畏重刑則外

輕敵故先王明制度于前重威刑于後刑重則內畏
內畏則堅矣蓋當是時六軍之制軍將皆命卿無事
則將歸卿列有事則諸卿皆將入則典司政本出則
經營四方宣王之時命召虎以平淮夷而王心載寧
又命皇父及程伯父以省徐土徐方爲之震驚然
三臣者皆世臣虎則康公之子皇父則南仲之世程
伯休父則重黎氏之後也世臣之于國非獨有世功
且有世業詩書禮樂風講于家庭功勲閭閻允孚于
內外耳目之見聞有素技藝之傳習有常一旦用之

必安詳閑雅。老成持重。不失于倉皇失律。輕易誤國矣。其後晉文公蒐于被廬。作三軍謀。元帥趙衰曰。郤穀可。臣亟聞其言矣。說禮樂而敦詩書。義之府也。禮樂德之則也。德義利之本也。夏書曰。賦納以言。明試以功。車服以庸。君其試之。乃使郤穀將中軍。已而入曹。公令無入。僖負羈之宮。而免其族。報施也。魏犢顛頤。怒曰。勞之不圖。報于何有。葵僖負氏。魏犢傷于胸。公欲殺之。而愛其材。使問見視之。病將殺之。犢束胸見使者曰。以君之靈。不有寧也。距躍三百。踊

三百乃舍之。殺顛頤以徇于師。立舟之僑以爲戎右。已而軍次于城濮。中軍風于澤。亡大旆之左旗。祁滿奸命。司馬殺之以徇諸侯。使茅茂代之。師還濟河。舟之僑先歸。士會攝右。振旅愷以入于晉。獻俘授馘。飲至大賞。徵會計貳殺舟之僑以徇于國民。于是大服。君子謂文公其能刑矣。三罪而民服。秦穆公時杞子自鄭使告于秦。曰：鄭人使我掌國門之管。若潛師以來國可得也。蹇叔曰：勞師以襲遠，非所聞也。穆公不聽。召孟明、西乞白乙出師于東門之外，攻之不克，圍

之不繼。滅滑而還。晉人邀之。敗于穀。獲百里。孟明西
乞術。白乙丙以歸。秦伯素服郊次。師而哭。曰。孤違蹇
叔。以辱二三子。孤之罪也。不替孟明。孤之過也。大夫
何罪。且吾不以一眚掩大德。殺之役。晉人既歸。秦師
大夫及左右皆言于秦伯曰。是敗也。孟明之罪也。必
殺之。秦伯曰。是孤之罪也。孤實貪以禍夫子。夫子何
罪。復使爲政。久之。孟明視帥師伐晉。以報殺之役。晉
侯禦之。及秦師戰于彭衙。秦師敗績。晉人謂秦拜賜
之師。秦伯猶用孟明。孟明增修國政。重施于民。乃率

師濟河焚舟取王宮及郊晉人不出遂自茅津濟封
殺尸而還遂霸西戎用孟明也君子以是知秦穆公
之爲君舉人之周也與人之——也孟明之臣也其不
解也能懼思也子桑之忠也其知人也能舉善也晉
悼公時公之弟楊干亂行于曲梁魏絳戮其僕公必
殺魏絳絳至授僕人書公讀其書曰日君乏使使臣
斯司馬臣聞師衆以順爲武軍事有死無犯爲敬君
合諸侯臣敢不敬君師不武執事不敬罪莫大焉臣
懼其死以及楊干無所逃罪不能致訓至于用鉞臣

古今治平畧

卷二十七

卷二十七

之罪重敢有不從以怒君心請歸死于司寇公跪而
出曰寡人之言親愛也吾子之奪君禮也寡人有弟
弗能教訓使干大命寡人之過也嘗以是考昔者鞏
之戰此晉兵也邲之戰亦此晉兵也夫晉豈强于鞍
而弱于邲哉而勝負異變功業相反何哉吾觀鞍之
役也韓厥戮人邲克分謗邲克流血張侯并轡至振
旅入國士燮後歸策勲勞將邲克先遜繇是范叔歸
功于荀庚欒書歸功于范燮有將如此烏得而不勝
若邲之戰則異于此矣方與楚遇荀林父欲還隋武

子亦欲還。先穀欲進。韓子亦欲進。至于鄭人如師。莧子欲許。欒武子欲不許。趙括趙同欲許。甚者魏錡求公族而未得。欲戰而敗。趙旃求卿而未得。而怨欲戰而敗。夫如是。雖微楚。晉固先潰。況以楚師壓之。則其敗也不亦宜乎。然則晉兵非異也。將帥之心不一故耳。師重長子。豈不信哉。齊景公時。晉伐阿甄。而燕侵河上。齊師敗績。景公患之。晏嬰乃薦田穰苴。曰。穰苴雖田氏庶孽。然其人文能附衆。武能威敵。願君試之。景公召穰苴。與語兵事。大說之。以爲將軍。將兵扞燕晉。

之師穰苴曰臣素卑賤君擢之閒伍之中加之大夫之上士卒未附百姓不信人微權輕願得君之寵臣國之所尊以監軍乃可于是景公許之使莊賈往穰苴既辭與莊賈約曰旦日日中會于軍門穰苴先馳至軍立表下漏待莊賈賈素驕貴親戚左右送之畱飲日中不至穰苴則仆表決漏入行軍勒兵申明約束約束既定夕時莊賈乃至穰苴曰何後期爲賈謝曰不佞大夫親戚送之故畱穰苴曰將受命之日則忘其家臨軍約束則忘其親援枹鼓之急則忘其身

今敵國深侵。邦內騷動。士卒暴露于境。君寢不安席。食不甘味。百姓之命皆懸于軍。何謂相送乎。召軍正問曰。軍法期而後至者云何。對曰。當斬。莊賈懼。使人馳報。景公請救。既往未及。反于是遂斬莊賈。以徇三軍。三軍之士皆振慄。久之。景公遣使者持節赦賈。馳入軍中。穰苴曰。將在軍。君令有所不受。問軍正曰。軍中不馳。今使者馳云何。正曰。當斬。使者大懼。穰苴曰。君之使不可殺之。乃斬其僕車之左。附馬之左。驂以徇。三軍。繇是士卒畏服。三軍用命焉。其後臨武君請

問爲將于孫卿對曰知莫大乎棄疑行莫大乎無過。事莫大乎無悔至無悔而止矣。不可必也。故制號政令欲嚴以威慶賞刑罰欲必以信處舍收藏欲周以固徙舉進退欲安以重欲疾以速窺敵觀變欲潛以深欲伍以參遇敵決戰必道吾所明無道吾所疑。夫是之謂六術無欲將而惡廢無怠勝而忘敗無威內而輕外無見其利而不顧其害凡慮事欲熟而用財欲泰夫是之謂五權所以不受命于主有三可殺而不可使處不完可殺而不可使擊不勝可殺而不可

使欺百姓。夫是之謂三至。凡受命于主而行三軍三
軍既定。百官得序。群物皆正。則主不能喜。敵不能怒。
夫是之謂至。臣慮必先事而申之。以敬慎終如始終
始如一。夫是之謂大吉。凡百事之成也。必在敬之。其
敗也。必在慢之。故敬勝怠則吉。怠勝敬則滅。計勝欲
則從。欲勝計則凶。戰如守。行如戰。有功如幸。敬誠無
曠。敬事無曠。敬吏無曠。敬衆無曠。敬敵無曠。夫是之
謂五無曠。慎行此六術。五權三至而處之以恭敬。無
曠。夫是之謂天下之將則通于神明矣。

漢高帝豁達大度知人善任初時以蕭何之言築壇
拜韓信爲大將一旦付以數十萬之衆不以爲輕陳
平一見拜爲都尉使之叅乘護軍雖受金之譖不以
爲疑嘗使酈食其往說魏王豹且召之豹不聽漢王
問食其魏大將誰也對曰項直王曰是口尚乳臭安
能當韓信驕將誰也曰馮敬曰是秦將馮無擇子也
雖賢不能當灌嬰步卒將誰也曰項它曰不能當曹
參吾無患矣隋何召九江王布至帝方踞床洗足召
布入見布大怒憐來欲自殺及出就舍帳御飲食從

官皆如帝居布又大喜過望。及成皐敗帝獨身遁宿
小修武傳舍。時韓信張耳將兵擊趙。帝晨馳入趙壁。
耳信尚未起。卽其卧內奪其印符以麾召諸將。易置
之。信耳起乃知帝來大驚。已信既定齊地使人言于
帝。請爲假王以鎮之。帝大怒。張良陳平躡漢王足因
附耳語曰。漢方不利。寧能禁信之自王乎。不如因而
立之。使自爲守。帝悟。因復罵曰。大丈夫定諸侯。卽爲
真王。何以假爲。卽遣良操印立信爲齊王。徵其兵擊
楚。後旣卽帝位。封信王。楚信初乏國。行縣邑。陳兵出。

入人有告信反者帝用陳平計僞遊雲夢會諸侯于
陳信謁令武士縛之載後車以歸還洛陽赦信爲淮
陰侯信知帝畏惡其能多稱病不朝羞與絳灌等列
帝嘗從容與韓信論諸將能將兵多少上問曰如我
能將幾何信曰陛下不過能將十萬上曰于君何如
曰臣多多而益善耳上笑曰多多益善何爲我禽信
曰陛下不能將兵而善能將將此乃信之所以爲臣
下禽也六年以陽夏侯陳豨反上自擊之令周昌還
趙壯士可將者白見豨上嫚罵曰豎子能將乎四

人情伏既而封各千戶以爲將。左右諫曰。封此何功。
上曰。豨反。趙代地皆豨有。吾徵天下兵。未有至者。今
計唯獨邯鄲中兵耳。吾何愛四千戶。不以慰趙子弟。
皆曰善。大抵高帝以爵土爲誘。勸而又有所執持之。
以陰奪其豪黠之性。如韓信既破魏。威名著矣。而卽
拜張耳爲梁國相。使之共擊齊。彭越下梁地十七城。
勲名猶未顯也。燒楚積聚。劉賈以親王參焉。夫豈不
知此二人者足當一面哉。而先有所參任以分其權。
者。誠陽假之權而陰持之也。故當是時。韓彭雖列地。

稱王而其權常在高帝欲其軍卽奪之軍欲其會卽促之會如釣者委之芳餌以悅其心而弱竿在手伸縮繇我而無掣肘之患故雖尊以榮名寵以厚實而卒無它憂然高帝之所以能此者繇其諸將之材素諸于胸中旣量諸將惟此三人足以成大功而又量我所用以執持之者足以相制而不至于相仇故屢底績信乎將將之善也善乎蘇老泉曰人君御臣相易而將難將有二有賢將有方將而御才將尤難御相以禮御將以術御賢將之善以信御才將之術以

智六畜其初皆獸也。彼虎豹能搏能噬而馬亦能蹄。牛亦能觸。先王知能搏能噬者不可以人力制。故殺之。不能驅之而後已。蹄者可馭以羈紲。觸者可拘以輻衡。故先王不忍棄其才而廢天下之用。如曰是能蹄是能觸。當與虎豹並殺而同驅。則是天下無騏驥。終無以服勝耶。先王之選才也。自非大姦劇惡。如虎豹之不可以變其搏噬者。未嘗不欲制之以術。而全其才以適于用。况爲將者。又不可責以廉隅細謹。顧其才何如耳。將之才固有大小。傑然于庸將之

中者才小者也。傑然于才將之中者才大者也。才小志亦小。才大志亦大。人君當觀其才之小大而爲制御之術。以稱其志。譬之養騏驎者。必豐其芻粒。潔其羈絡。而後責之千里。彼騏驎者。其志常在千里也。夫豈以一飽而廢其志哉。至于養鷹。則不然。獲一雉。飼以一雀。獲一兔。飼以一鼠。彼知不盡其力于擊搏。則其勢無所得食。故然後爲我用。才大者騏驎也。不先賞之。是養騏驎者饑之。而責其千里不可得也。才小者鷹也。先賞之。是養鷹者飽之。而求其擊搏亦不可。

得也是故先賞之說可施之才大者不先賞之說可施之才小者兼而用之可也昔者漢高帝一見韓信而授以上將解衣衣之推食哺之一見黥布而以爲淮南王供具飲食一如王者一見彭越而以爲相國當是時三人者未有功于漢也厥後追項籍垓下與信越期而不至捐數千里之地以畀之如棄敝屣項氏未滅天下未定而三人者已極富貴矣何則高帝知三人者之志大不極于富貴則不爲我用雖極于富貴而不滅項氏不定天下則其志不已也至于樊

噲○滕○公○灌○嬰○之○徒○則○不○然○拔○一○城○陷○一○陣○而○後○增○數○
級○之○爵○否○則○終○歲○不○遷○也○項○氏○已○滅○天○下○已○定○樊○噲○
滕○公○灌○嬰○之○徒○計○百○戰○之○功○而○後○爵○之○通○侯○夫○豈○高○
帝○至○此○而○嗇○哉○知○其○才○小○而○志○小○雖○不○先○賞○不○怨○而○
先○賞○之○則○彼○將○秦○然○自○滿○而○不○復○以○立○功○爲○事○故○也○
噲○方○韓○信○之○立○于○齊○酈○通○武○涉○之○說○未○去○也○當○是○之○
時○而○奪○之○王○漢○其○殆○哉○夫○人○豈○不○欲○三○分○天○下○而○目○
立○者○而○彼○則○曰○漢○王○不○奪○我○齊○也○故○齊○不○捐○則○韓○信○
不○懷○韓○信○不○懷○則○天○下○非○漢○之○有○嗚○呼○高○帝○可○謂○知○

大計矣。後文帝十四年，馮唐爲郎中署長。帝輦過問曰：「父老何自爲郎家？」安在？」對曰：「臣大父趙人。」帝曰：「昔有爲我言趙將李齊之賢，戰于鉅鹿下，今吾每飯未嘗不在鉅鹿也。」父知之乎？」唐曰：「尚不如廉頗、李牧之爲將也。」上曰：「何以？」唐曰：「臣大父在趙時，爲官卒將善李牧、臣父故爲代相，善趙將李齊，知其爲人也。」帝拊髀曰：「嗟夫！吾獨不得廉頗、李牧爲將耳！何憂匈奴哉？」唐曰：「陛下雖得頗、牧，弗能用也。」帝怒起入禁中，良久召讓唐曰：「公奈何衆辱我，獨無間處乎？」唐謝曰：「鄙人

不知忌諱。當是之時。匈奴新大入朝那。殺北地都尉。昂上以胡寇爲意。乃卒復問曰。公何以知吾不能用廉頗李牧也。對曰。上古王者之遣將也。跪而推轂曰。闡以內寡人制之。闡以外將軍制之。軍功爵賞皆決于外。歸而奏之。此非空言也。臣大父言。李牧之爲趙將。居邊軍市之租。皆自用。餐士賞賜。決于外。不從中覆也。委任而責成功。故李牧乃得盡其智能。是以北逐單于。破東胡。滅僭林。西抑強秦。南支韓魏。當是時。趙幾霸。後會趙王遷立。用郭開讒而誅李牧。是以爲

秦○所○滅○今○臣○竊○聞○魏○尚○爲○雲○中○守○收○軍○市○租○盡○以○給○
士○卒○出○私○養○錢○伍○日○一○殺○牛○以○饗○賓○客○軍○吏○舍○人○是○
以○匈○奴○遠○避○不○近○雲○中○之○塞○虜○嘗○一○人○尚○帥○車○騎○擊○
之○所○殺○甚○衆○夫○士○卒○盡○家○人○子○起○田○中○從○軍○安○知○尺○
籍○伍○符○終○日○力○戰○斬○首○擄○虜○上○功○幕○府○一○言○不○相○應○
文○吏○以○法○繩○之○其○賞○不○行○而○法○必○用○愚○以○爲○陛○下○法○
太○明○賞○太○輕○罰○太○重○且○雲○中○守○尚○坐○上○功○首○虜○差○六○
級○陛○下○之○吏○削○其○爵○罰○作○之○繇○此○言○之○陛○下○雖○得○
李○牧○不○能○用○也○上○悅○是○日○令○唐○持○節○赦○尚○復○爲○雲○中○

太守而拜唐爲都尉。漢武之世，兵數大出。元朔之後，諸較力戰。公孫敖、李蔡、李沮、李息、輩皆從大將軍衛青，屢有功勲。至于三子封侯，青不受賞。謝曰：「諸較之力，夫元戎與列較如此，以之克獲，雖三萬不爲之寡。迨元狩以後，霍去病如寵衛青之眷，始衰分兵異出，而敢戰深入之士皆屬去病。青繇是心不平矣。李廣欲先當匈奴，而青使並出東道，廣固辭青固遣卒以失期死。青以不見敵，不封而去病日盛，當是時，兩軍出塞，馬凡十四萬匹，而後入塞者不滿三萬，則不和。」

故也。故曰：選兵不如選將。一士心不如一將心。雖然，士卒有心，將帥一之；將帥有心，其誰能一？蓋至于此，則事歸于廟堂，而功繫于君相。趙充國上屯田之奏，將持久以敵先零，非魏弱翁任其說，則豈能以成功哉？東漢光武亦善御將，關輔之役，不取諸將之健闘，而獨遣馮異、潁川之寇，以寇恂之憂國而獨委寇恂。荊州之事，以吳漢之不習舟師而獨任岑彭，皆素知才畧而明于授任，又能感之以恩，假之以權，結之以心。觀賈復病傷之時，帝撫然大驚曰：「果然失吾名將！」

聞其婦有孕生女邪我男娶之生男邪我女嫁之一
時恩意真足以感動英豪之心至祭遵以軍法殺舍
中兒而謂諸將曰當避祭遵舍中兒犯法尚且殺之
必不私諸卿軍旅安得不警及賈復之于寇恂有部
將誅戮之耻則又爲之致禮極歡以消其怒曰天下
未定兩虎得安得私闢今日朕分之遂戮力同心以
濟天下之難帝之御將亦可謂多術矣馮異平定關
中人有言其專制關中斬長安令威權至重百姓歸
心號爲咸陽王帝使以章示異異惶懼上書謝罪詔

報曰將軍之于國家義爲君臣。恩猶父子。何嫌何疑。而有懼意。六年春。異朝京師。引見帝。謂公卿曰。是我起兵時主簿也。爲吾披荆棘。定關中。旣罷。使中黃門賜以珍寶衣服。錢帛。詔曰。倉卒蕪蕪。亭豆粥。庠沱河麥飯。厚意久不報。異稽首謝曰。臣聞管仲謂桓公曰。願君無忘射鉤。臣無忘轎車。齊國賴之。臣今亦願國家無忘河北之難。小臣不敢忘巾車之恩。後數引譙見定議圖蜀。畱十餘日。令異妻子隨異還西。光武嘗與功臣諸侯譙語。從容言曰。諸卿不遭際會。自度爵

祿何所至乎。高密侯鄧禹先對曰：臣少嘗學問，可郡文學博士。帝曰：何言之謙乎？鄧氏子志行修整，何爲不掾功曹？餘各以次對。至馬武曰：臣以武勇可守尉，督賊。帝笑曰：且勿爲盜賊，自致亭長，斯可矣。武爲人嗜酒，濶達，敢言。時醉在御前，面折同列，言其短長，無所避忌。帝故縱之以爲笑樂。帝雖制御功臣，而每能回容，宥其小失。遠方貢珍，必先徧賜列侯，而太官無餘。有功輒增邑賞，不任以吏職，故皆保其福祿。終無誅譴者。建武十三年，陳璜約論漢法軍行逗遛。

畏候者斬。于是詔邊吏追虜者，或遠或近，量敵進退，不拘以逗遛法。其後南陽太守杜詩上疏曰：陛下亮成天工，克濟大業，唯匈奴未譬聖德，威侮二垂，邊民虛耗，不能自守。臣恐武猛之將雖勤，亦未得解甲褫弓也。夫勤而不息，亦怨；勞而不休，亦怨。怨恨之師，難復責功。伏覩將帥之情，功臣之望，冀一休足于內郡。然後卽戎出命，不敢有恨。夫師克在和，不在衆。陛下雖垂念北邊，亦當頗泄用之。昔湯武善御衆，故無忿鷙之師。陛下起兵十有三年，將帥和睦，士卒鳧藻，今

若使公卿郡守出于軍壘則將帥自厲士卒之復北
于伯衛則戎士自百何者天下已安各重性命大臣
以下咸懷樂土不酬其功而厲其用無以勸也誠宜
虛缺數郡以俟振旅之臣重復厚賞加于久役之士
如此緣邊屯戍之師競而忘死乘城拒塞之吏不辭
其勞則烽火精明守戰堅固聖王之政必因人心今
猥用愚薄塞功臣之望誠非其宜帝嘉納之蓋古稱
善將將者莫如漢高光武高帝之于韓信也請兵則
兵請王則王未聞有殊一方畧異一謀議者而馮異

專制關中。光武推赤心而置之腹。君臣父子之諭。懇
懇然發于至誠。彼二將者。安得不殫智畢力。報國士
之遇。而赴功名之會哉。至于絳灌諸公。帝未嘗遣特
將。雖或特遣。未嘗不稟受成算。而獨于信。則不御知
信之能也。東漢諸將。往往皆中繩墨。歸節制。無飛揚
跋扈之態。而有戡定禍亂之畧。豈非其善御使然哉。
晉武帝時。馮統嘗侍帝。從容論魏晉事。因曰。臣切謂
鍾會之釁。頗繇太祖。帝變色曰。卿何言邪。統免冠謝
曰。臣愚冗瞽言。罪應萬死。然臣微意。猶有可申。帝曰。

何以言之。紘曰。臣以爲善御者。必識六轡盈縮之勢。善政者。必審官方控帶之宜。故仲由以兼人被抑。冉求以退弱被進。漢高八王。以寵過夷滅。光武諸將。繇抑損克終。非上有仁暴之殊。下有愚智之異。蓋抑揚與奪使之然耳。鍾會才具有限。而太祖誇獎太過。嘉其謀猷。盛其名器。居以重勢。委以大兵。故使會自謂算無遺策。功在不賞。輒張跋扈。遂遘凶逆耳。向令太祖錄其小能。節之大禮。抑之以權勢。納之以軌則。則亂心無繇而生。亂事無繇而成矣。帝曰。然。元帝大興。

三年虞預以寇賊未平當須良將二弟曰翼蜀承平
之世其教先文揆亂之運非武不效野之戰曰望
伏鉞淮夷作難召伯專征獫狁爲暴衛霍長驅故陰
陽不和擢士爲相三軍不勝拔卒爲將漢帝旣定天
下猶思猛士以守四方孝文志存鉅鹿馮唐進說魏
尚復守詩稱赳赳武夫公侯干城折衝之佐豈可忽
哉况今中州羗獘百無一存牧守官長非戎貊之族
類卽寇竊之幸脫陛下登祚威暢四遠故令此等反
善而化然狼子獸心輕薄易動羯虜未殄益使難安

周撫陳川相係背叛徐龕驕黠無所拘忌放兵侵掠
罪已彰灼昔葛伯違道湯獻之牛羊吳淠失禮漢錫
以几杖惡成罪著方復加戮龕之小醜可不足滅然
豫備不虞古之善教矧乃有虞可不與防爲防之術
宜得良將將不素簡難以應敵望諮之群公博舉于
衆若當局之才必允其任則宜獎勵使不顧命旁料
冗猥或有可者厚加寵待足令忘身昔英布見慢恚
欲自殺出觀供置然後致力禮遇之恩可不隆哉元
魏孝明時諸方賊盛而南寇侵境山蠻作逆孝明欲

親討以荊州爲先。詔辛雄爲行臺左丞。在軍上監。凡
人所以臨堅陳而忘身。觸白刃而不憚者。一則求
榮名。二則食重賞。三則畏刑罰。四則避禍難。非此數
事。雖聖王不能勸其臣。慈父不能厲其子。明主深知
其情。故賞必行。罰必信。使親疎貴賤。勇怯賢愚。聞鐘
鼓之聲。見旂旗之列。莫不奮銳赴敵。豈厭久生而樂
早死也。利害懸于前。欲罷不能耳。自秦隴逆節。蠻左
亂常。凡在戎役。敗多勝少。跡其所繇。不明賞罰。故也。
兵將之勲。歷稔不決。亡軍之卒。晏然在家。致令節士

無○所○勸○慕○庸○人○無○所○畏○懾○進○而○擊○賊○死○交○而○賞○賒○退○而○逃○散○身○全○而○無○罪○此○其○所○以○望○敵○奔○沮○不○宜○進○力○者○矣○若○重○發○明○詔○更○量○賞○罰○則○軍○威○必○張○賊○難○可○弭○臣○聞○必○不○得○已○去○食○就○信○以○此○推○之○信○不○可○斯○須○廢○也○賞○罰○陛○下○之○所○易○尚○不○能○全○而○行○之○攻○敵○士○之○所○難○欲○其○必○死○寧○可○得○也○又○路○恩○令○上○䟽○以○爲○師○出○有○功○在○于○將○帥○得○其○人○竊○以○比○年○將○帥○多○寵○貴○子○孫○御○杯○擢○馬○志○逸○氣○浮○軒○眉○攘○腕○以○攻○戰○自○許○及○臨○大○敵○憂○怖○交○懷○雄○圖○銳○氣○一○朝○頓○盡○乃○令○羸○弱○在○前○以○質○

冠○強○壯○居○後○以○衛○身○兼○復○器○械○不○精○進○止○無○節○以○當○
負○險○之○衆○敵○數○戰○之○虜○欲○其○不○敗○豈○可○得○哉○夫○德○可○
以○感○義○夫○恩○可○以○勸○死○士○今○若○黜○陟○幽○明○賞○罰○善○惡○
先○遣○辨○士○曉○以○禍○福○如○其○不○悛○以○順○討○逆○如○此○則○何○
異○厲○蕭○斧○以○伐○朝○菌○彭○洪○爐○而○燎○毛○髮○哉○唐○太○宗○時○
并○州○大○都○督○長○史○李○世○勣○在○州○十○六○年○令○行○禁○止○民○
夷○懷○服○太○宗○曰○隋○煬○帝○勞○百○姓○築○長○城○以○備○突○厥○卒○
無○所○益○朕○惟○置○李○世○勣○于○晉○陽○而○邊○塵○不○驚○其○爲○長○
城○豈○不○壯○哉○嘗○謂○李○靖○曰○當○今○將○帥○惟○李○勣○李○道○宗○

薛萬徹孰堪大用靖對曰陛下常言勸道宗用兵不大勝亦不大敗萬徹若不大勝卽須大敗臣思聖言不求大勝亦不大敗者節制之兵也或大勝或大敗者倖而成功者也故孫武曰善戰者立于不敗之地而不失敵之敗也節制在我云耳初秦叔寶從李密後歸王世充見世充多詐數與下呪誓乃死姬非慄亂主也至武德四年卽棄世充降唐高祖俾事秦王府王尤獎禮從鎮長春宮拜馬軍總管戰美良州破遲敬德功多帝賜以黃金瓶勞曰卿不恤妻子而

來歸我且又立功使朕肉可食當割以啖爾況子女
玉帛乎尋授秦王右三統走宋金剛于介休拜上柱
國從討世充建德黑闥遇盜未嘗不身先鋒鏖陣前
無堅對積賜金帛以千萬計進封莫國公每敵有驍
將銳士震耀出人以夸衆者秦王輒命叔寶往取之
躍馬挺鎗刺于萬衆中莫不如志時劉武周大破走
突厥其將尉遲敬德尋相等降已而尋相等多叛去
諸將疑敬德囚之世民曰敬德若叛豈在尋相之後
耶遽命釋之引入臥內賜之金曰丈夫意氣相期勿

以小嫌介意。吾終不信。纔言以害忠良。公宜體之。必欲去者。以此金相資。表一時共事之情也。已而世民以五百騎行戰地。王世充帥騎萬餘。猝至圍之。單雄信引槩直趨世民。敬德躍馬大呼。橫刺雄信。墜馬。翼世民出圍。會屈突通引大兵。繼至。世充大敗。僅以身免。世民謂敬德曰。公何相報之速也。賜敬德金銀一篋。自是寵遇日隆。貞觀中。侯君集討高昌。配沒罪人。不以聞。又私取珍寶婦女。將士因亦盜入。不能制。及還京師。有司劾之。詔君集詣獄。薄對中書侍郎岑文本。

本諫曰高昌之罪議者以其遐遠欲置度外唯陛下
奮獨見之明以決勝之畧君集得指期平殄今推勞
將帥從征之人悉蒙重賞未踰數日更以屬吏天下
聞之謂陛下錄過遺功無以勸後且古之出師克敵
有重賞不勝蒙顯戮當其有功也雖貪財縱欲尚蒙
爵邑其無功也雖勤躬潔已不免銖鉞故曰記人之
功忘人之過宜爲君者也昔李廣利貪不愛士卒陳
湯盜所收康居財物二主皆赦其罪封侯賜金夫將
帥之臣廉甚少而貪沒多軍法曰使智使勇使愚故

智者樂立其功。勇者好行其志。貪者邀趨其利。愚者不計其死。是以前聖使人必收所長而棄所短。陛下宜申宥君集。俾復朝列。以勸有功。帝寤。釋不問。高宗儀鳳中。吐蕃數盜邊。太學生魏元忠上封事曰。天下之柄有二。文武而已。至制勝御人。其道一也。今言武者。先騎射。不稽之權畧。言文者。首篇章。不取之經綸。臣觀魏晉齊梁。才固不乏。然何益治亂哉。養繇基射能穿札。不止鄢陵之奔。陸機論能辨亡。無救河橋之敗。斷可見矣。夫才生于世。世實須才。志士在富貴。與

貧賤○皆思立功名○以傳于後○然知已難○而所遇罕○士
之懷琬琰○就煨塵○抱棟幹○用溝壑者○悠悠之人○直嗜
此士之貧賤○安知其方畧哉○故漢拜韓信○舉軍驚笑○
蜀用魏延○群臣觸桎○此富貴者易爲○善○貧賤者難爲
功也○昔漢文帝○不知魏尚○賢而囚之○知李廣才而不
用○乃歎其生不逢時○夫以廣之才○天下無雙○時方歲
事匈奴○而卒不任○故近不知尚○廣之賢○而遠想廉○頗
李牧○馮唐○是以知其有○而不能用也○此身爲時主○所
知○不得盡其才也○晉羊祜○謀舉吳○賈充荀勗○沮之○祜

歎曰天下事不如意十常八九以二人不同終不大
舉此據立功之地而不獲展其志也布衣之人懷奇
抱策而望朝奏夕召豈易得哉臣願歷訪文武五品
以上得無有志如羊祜武如李廣而不得騁其才者
乎使各言其志毋令久失職又軍無常勝將有能否
兵爲王者大事存亡係焉將非其任則殄人敗國周
亞夫堅壁以挫吳楚司馬懿閉營而困諸葛亮此皆
全軍制勝不戰而卻敵是知大將臨戎以智爲本今
之用人類將家子或死者孤兒進非幹畧雖竭力盡

謂不免于傾敗。若之何用之。且建功者言其所懷。不
言所來。言其所能。不言所藉。若陳湯。呂蒙。馬隆。孟觀。
悉出貧賤。而勲伐甚高。不聞其家世將帥也。故陰陽
不和。握士爲相。蠻貊不庭。摧校爲將。今以四海之廣。
億兆之衆。豈無卓越之士。臣恐未之思乎。又賞者禮
之基。罰者刑之本。禮崇則謀夫竭。其能賞厚則義士
輕。其死刑正。故君子勗其心。罰重則小人懲其過。賞
罰者軍國之綱紀。政教之藥石。吐蕃本非強敵。而薛
仁貴郭待封至棄甲喪師。脫身以免。國家寬政罪止。

削除網漏吞舟○何以過此○雖陛下顧收後効○然朝廷
所○少○豈○此○一○二○人○乎○夫○刑○賞○一○虧○百○年○不○復○故○國○無
賞○罰○雖○堯○舜○不○能○爲○今○罰○旣○不○行○賞○復○難○信○故○議○者
皆○謂○比○日○征○行○虛○立○賞○格○而○無○其○實○蓋○忘○大○體○之○臣
恐○資○勲○庸○竭○府○庫○畱○意○雖○刀○以○爲○益○國○所○謂○惜○毫○厘
失○千○里○者○也○且○黔○首○雖○微○不○可○以○欺○安○有○寓○不○信○之
令○設○虛○賞○之○格○乎○且○賞○旣○不○用○勲○亦○淹○廢○歲○月○紛○淆
真○僞○相○錯○蓋○吏○不○奉○法○慢○自○京○師○僞○勲○所○繇○主○司○過
也○其○則○不○遠○近○在○尚○書○省○中○然○未○聞○斬○一○臺○郎○戮○一

令吏使天下知之。陛下何照遠而不照近哉。慈父多
敗子嚴家無格虜。且人主病不廣大。人臣病不節險。
臣恐陛下病之于不廣大。過在于慈父故也。玄宗開
元二十八年。特進蓋嘉運破突騎。馳還。詔爲河西隴
右節度使。因令經畧吐蕃。嘉運以新立功。日酣遊。未
赴屯。裴耀卿言于帝曰。嘉運精勁勇烈。誠有餘。然臣
見其夸言驕色。竊憂之。恐不足與立事。今盛秋防邊。
日月已薄。常與軍中士卒相見。若不素講。決在一時。
非制勝萬全之義。且兵未及訓。不能知法。士未懷恩。

不可共心使幸而有功○非師出以律之善○又萬人之
命倚于將○示不得已○故鑿凶門而出○今酣呶朝夕○肆
肆自安○非愛人憂國者○不可不察○苟不易帥○宜嚴詔
申約○以督其行○帝乃促嘉運詣部○卒無功還○德宗時
陸贄疏曰○剋敵之要在乎將○得其人○馭將之方在乎
操○得其柄○將非其人者○兵雖衆不足恃○操失其柄者
將雖材不爲用○兵不足恃○與無兵同○將不爲用○與無
將同○將不能使兵○國不能馭將○非止費財翫寇之弊○
亦有不戢自焚之災○自昔禍亂之興○何嘗不繇于此○

今兩河淮西爲叛亂之帥者，獨四五內人而已。以陛下英神志期平壹，君臣之勢不類，逆順之理不作，形勢之大小不倫，師徒之衆寡不敵。然尚曠歲持久，師老費財，加算不止于舟車，徵卒殆窮于閩濮，而將帥者尚曰財不足，兵不多。此臣所以千慮百思而不悟其理也。田悅唱亂之始，氣盛力全，恒趙青齊迭爲唇齒。陛下特詔馬燧，委之專征，抱真李芄聲勢相援，于時士吏畏法，將帥感恩，以故能累摧堅陣，深抵窮巢。故曰尅敵之要在乎將得其人，馭將之方在乎操得。

其柄此其明效也。田悅旣敗，力屈勢窮，且皆離心，莫有固志。乘我師勝捷之氣，躡亡虜傷夷之餘，比于前功，難易百倍。天旣而大軍遂駐，遺孽復安。其後餽運日增，師徒日益。于茲再稔，竟不交鋒。量兵力則前者寡，而今者多。議軍資則前者薄，而今者厚。論氣勢則前者新集，而今者乘勝。度攻守則前者草創，而今者繕完。計兇黨則前者盛，而今者殘。揣敵情則前者銳，而今者挫。然當易而反難，當進而中止。故曰：將非其人者，兵雖衆不足恃。操失其柄者，將雖材不爲用。今

師興三年可謂久矣。稅及百物可謂繁矣。而寇亂有
益。翦滅無期。人搖不寧。事變難測。是以兵貴拙。速不
尚。巧遲速則乘機。遲則生變。勞心于服遠者。莫若修
近。而其遠自來。多方以救失者。莫若改行。而其失自
去。若不靖于本。而務救于末。則救之所爲。乃禍之所
起也。修近之道。改行之方。易于舉毛。但在陛下然之
與否耳。儻或重難。易制姑務持危。則當較禍患之輕
重。辯攻守之緩急。臣謂幽燕恒魏之寇勢。緩而禍輕。
汝洛滎汴之虞勢。急而禍重。緩者宜圖之以計。今失

于屯戍太多○急者宜備之以嚴○今失于守禦○不足何○
以言其然也○朝廷置河朔于度外○殆三十年矣○非一○
朝一夕之所急也○田悅累經覆敗○氣沮勢羸○武俊朱○
滔受其誘陷○遂爲猖狂○然衆情不附○內外防虞○加以○
淇河太行禦其衝○并汾洛潞壓其腹○雖欲放肆○亦何○
能爲○况此郡兇徒互相刦制○急則合力退則背憎○此○
所謂幽燕恒魏之寇勢○緩而禍輕○希烈忍于傷殘○果○
于吞噬○據蔡許富全之地○益鄧襄鹵獲之資○意殊無○
厭○兵且未鋤○東寇則轉輸將阻○北窺則都城或驚○此○

所謂汝洛榮○汴○之虞○勢○急○而○禍○重○代○朔○邠○靈○之○騎○士○
自○昔○之○精○騎○也○上○黨○明○津○之○步○卒○當○今○之○練○卒○也○悉○
此○疆○勁○委○之○出○東○勢○分○于○將○相○財○屈○于○兵○廣○以○攻○則○
曠○歲○不○進○以○守○則○數○倍○有○餘○各○懷○顧○瞻○遞○欲○推○倚○此○
所○謂○緩○者○宜○圖○之○以○計○今○失○于○屯○戍○太○多○李○勉○以○文○
吏○之○材○當○浚○郊○奔○突○之○會○哥○舒○曜○以○烏○合○之○衆○捍○襄○
野○豺○狼○之○群○雖○連○發○禁○軍○以○爲○繼○援○但○恐○本○非○素○習○
令○不○適○從○首○鼠○應○敵○因○循○莫○前○此○所○謂○急○者○宜○備○之○
以○嚴○今○失○于○守○禦○不○足○若○使○懷○光○帥○師○救○襄○城○之○圍○

李芄還鎮爲東都之援。汝洛旣固。梁宋亦安。是乃取有餘。救不足。罷閔右賦車籍馬之擾。滅山東飛芻輓粟之勞。議者若曰。河朔群盜尚未殲夷。儻又減兵。必更生患。臣請有以詰之。前歲伐叛之初。唯馬燧抱真李芄三帥而已。以攻必克。以戰必彊。是則力非不足。明矣。泊遲留不進。乃請益師。于是選神策銳卒以繼之。而李晟往矣。猶曰。請益師。于是召朔方全軍以赴之。而懷光往矣。幾遣加半之戍。竟無分寸之功。是則師不在衆。又明矣。然而可託以爲解者。必曰。王師雖

益賊黨亦增。曩獨田悅寶臣。今兼朱滔武俊。臣請再詰以塞其辭。曩之田悅寶臣皆蓄銳養謀。劇賊之方疆者也。尋而田悅喪敗。寶臣殲夷。雖復朱滔武俊加于前。亦有孝忠。日知乘其後。是則賊勢不滋于曩日。王師有溢于昔時。又明矣。曩以太原澤潞河陽三將之衆。當田悅朱滔武俊三寇之兵。今朱滔遁歸武俊。退縮唯此田悅。假息危城。設使我師悉歸。彼亦纔能自守。况畱抱真馬燧。足得觀釁討除。是則減兵東征。勢必無患。又明矣。畱之則彼爲冗食。徙之則此得長。

城化危爲安息費從省舉一而兼數利惟陛下圖之
德宗建中四年朱泚反出幸奉天李懷光以千里赴
難不得朝頗恚恨屯兵不出戰明年帝又遣李晟李
建徽楊惠元三節度與之聯屯晟懼爲所并乃移屯
陸贄上狀曰懷光當管師徒足以獨制兇寇逗遛未
進抑有他繇所患大強不資旁助此者又遣李晟李
建徽楊惠元三節度之衆附麗其營無益成功祇足
生事何則四軍接壘群帥異心論勢力則懸絕高卑
據職名則不相統屬懷光輕晟等兵微位下而忿其

制不從心。晟等疑懷光養寇蓄姦而怨其事多凌已。端居則互防飛謗。欲戰則遞恐分功。齟齬不和。嫌釁遂起。俾之同處。必不兩全。太上消慝于未萌。其次救失于始兆。況乎事情已露。禍難垂成。委而不謀。何以寧亂。李晟見機慮變。先請移軍就東。建徽惠元勢轉孤弱。爲其吞噬。理在必然。今因李晟願行。便遣合軍同往。託言晟兵素少。慮爲賊泚所邀。藉此兩軍迭爲犄角。仍先諭旨。密使促裝。詔書至營。卽日進路。懷光意雖不欲。然亦計無所施。是所謂先聲有奪人之心。

疾雷不及掩耳者也。夫制軍馭將所貴見情離合疾

徐各有宜適當離者合之則召亂當合者離之則寡

功當疾而徐則失機當徐而疾則漏策得其要契其

時然後舉無敗謀措無危勢今者屯兵而不肯爲用

聚將相而罔能叶心自爲鯨鯢變在朝夕留之不足

以相制徒長厲階析之各競于擅能或建勲績理盡

于此唯陛下圖之興元元年上以李晟渾瑊討朱泚

謂陸贄曰晟瑊將軍當議規畫令其進取贄對曰將

貴專謀兵以奇勝軍機遲制則失變戎帥稟命則不

威是以古之賢君選將而任。分之于間。誓莫干也。授之以鉞。俾專斷也。夫然故軍敗則死。衆戰勝則策勲。不用刑而師律自不勞慮。而武功立。自昔帝王之所。以夷大難。成大業者。繇此道也。其或疑于委任。以制斷。繇已爲大權。昧于責成。以指麾。順旨爲名。將鋒鏑。交于原野。而決策于九重之中。機會變于斯須而定。計于千里之外。違令則失順。從令則失宜。上有掣肘之譏。下無死綏之志。當今事宜所繫尤切。蓋以寇盜充斥。乘輿播遷。秦梁廻繚千里。而遙臨之以威。則力

勢○不○制○授○之○以○策○則○阻○遠○不○精○頃○者○驟○降○詔○書○教○諭○
群○帥○事○無○大○小○悉○爲○規○裁○及○乎○章○表○陳○誠○使○臣○復○命○
進○退○遲○速○率○垂○聖○謀○豈○皆○樂○于○違○忤○哉○亦○繇○傳○聞○與○
指○實○不○同○懸○算○與○臨○事○有○異○故○也○設○使○其○中○或○有○肆○
情○奸○令○者○陛○下○能○于○此○時○戮○其○違○詔○之○罪○乎○臣○竊○恐○
未○能○也○陛○下○復○能○奪○其○兵○而○易○置○將○帥○乎○臣○亦○恐○未○
能○也○是○則○違○命○者○既○不○果○行○罰○從○命○者○又○未○必○叶○宜○
徒○費○空○言○祇○勞○睿○慮○匪○爲○無○益○其○損○實○多○何○則○時○方○
艱○屯○下○凌○上○替○凡○在○執○干○戈○而○衛○社○稷○者○皆○自○謂○勲○

業○繇○已○義○烈○發○心○安○于○專○行○病○于○羈○制○陛○下○宜○俯○循○
斯○意○因○而○委○之○遂○其○所○安○護○其○所○病○敦○以○付○授○之○義○
固○以○親○信○之○恩○假○以○便○宜○之○權○待○以○殊○常○之○賞○慎○其○
言○以○取○重○深○其○託○以○示○誠○言○見○重○則○君○道○尊○託○以○誠○
則○人○心○感○尊○則○不○言○而○衆○服○感○則○不○令○而○事○成○其○勢○
當○令○智○者○騁○謀○勇○者○奮○力○小○大○咸○極○其○分○賢○愚○各○適○
其○懷○將○自○效○忠○兵○自○樂○戰○與○夫○追○于○驅○制○不○得○已○而○
從○之○者○志○氣○何○啻○百○倍○哉○贊○又○論○儲○糧○疏○有○曰○陛○下○
忿○蕃○醜○之○暴○掠○懲○邊○鎮○之○空○虛○繕○甲○益○兵○庇○人○保○境○

此誠雄武之英志、覆育之仁心、刷憤耻而揚威聲、海
內咸望有必攻之期矣、旣而統帥無律制、事失權、戍
卒不隸于守、臣守臣不總于元帥、至有一城之將、一
旅之兵、各降中使監臨、皆承別詔委任、分鎮亘千里
之地、莫相率從、沿邊列十萬之師、不設謀主、每至犬
羊犯境、方馳書奏、取裁、行李往來、動踰旬日、比蒙徵
兵發救、寇已獲勝、罷歸、小則蹂藉麥禾、大則驅掠人
畜、是乃益兵甲而費財用、竟何補、侵軼之患哉、吐蕃
之比于中國、衆寡不敵、工拙不侔、然而彼攻有餘、我

守不足。蓋彼之號令。繇將而我之節制。在朝彼之兵。衆合并而我之部分。離析夫部分離析。則紀律不一。而氣勢不全。節制在朝。則謀議多端。而機權多失。故曰。措置乖方。此之謂也。初。帝出幸奉天。張延賞以西川節度使貢獻踵道。及次梁。倚劍蜀爲根本。帝還。謔入秉政。初。吐蕃寇劍南。李晟總神策軍戍之。及還。以成都倡自隨。延賞遣吏奪取。故晟銜之。至是。鎮鳳翔。帝所倚重。表陳宿憾。帝不得已。罷延賞爲尚書左僕射。然雅意決用之。以晟嘗爲韓滉識。擢命滉移書道。

意及俱入朝。滉從容邀晟平憾，且使薦延賞于帝。于是復拜平章事。旣而宴禁中，帝出瑞錦一端分繫之，以示和解。晟因爲子請婚，延賞不許。晟曰：「吾武夫，雖有舊惡，盃酒間可解。儒者難犯外睦而内含怒，今不許婚，曩未忘也。」先時吐蕃尚結贊請和，晟奏：「戎狄無信，不可許。」滉亦請調軍食，時邊無聽和，帝疑將帥邀功生事，議未決。會滉卒，延賞揣帝意，遂罷晟兵。奏以給事中鄭雲逵代之。帝曰：「晟有社稷功，俾自擇代者，乃用邢君牙而拜晟大尉，兼中書令，奉朝請，是夏吐

舊背約却渾瑊將較多沒如晟等策故事臨軒冊拜
三公中書令讀冊侍中贊禮或闕則宰相攝事晟當
拜而延賞薄其禮用尚書崔漢衡劉滋代攝時議遣
劉玄佐復河湟玄佐辭西討延賞更川李抱真抱真
怨延賞奪晟兵不肯行繇是功臣解體憲宗元和四
年以左神策中尉吐突承璀爲招討處置使翰林學
士白居易奏以爲國家征伐當責成將帥近歲始以
中使爲監軍自古及今未有徵天下之兵專令中使
統領者也臣恐四方聞之必輕朝廷四夷聞之必笑

中國陛下恐令後代相傳云以中官爲制將都統自
陛下始乎穆宗長慶二年盧龍兵陷弓高先時弓高
守備甚嚴有中使夜至守將不納旦乃得入中使大
詬怒賊謀知之他日僞遣人爲中使夜至守將遽納
之賊衆隨入又圍下博中書舍人白居易上言曰臣
聞兵多則難用將衆則不一自幽鎮逆命朝廷徵兵
十七八萬四面攻圍已逾半年王師無功賊勢猶盛
弓高旣陷糧道不通下博深州饑窮日急蓋繇節將
大衆其心不齊未立功者或已拜官已敗衄者不聞

得○罪○既○無○懲○勸○以○至○遷○延○請○令○李○光○顏○將○諸○道○勁○兵○
約○三○關○萬○人○從○東○速○進○開○弓○高○糧○路○合○下○博○諸○軍○解○
潞○邢○重○圍○與○元○翼○合○勢○令○裴○度○將○大○原○全○軍○兼○招○討○
舊○職○四○面○壓○陳○觀○釁○而○動○若○乘○虛○得○便○卽○令○同○力○剪○
除○若○戰○勝○賊○窮○亦○許○受○降○納○款○如○此○則○夾○攻○以○分○其○
力○招○諭○以○動○其○心○必○內○自○誅○夷○自○生○變○故○仍○詔○光○顏○
選○留○諸○道○精○兵○餘○悉○遣○歸○本○道○蓋○兵○多○而○不○精○豈○惟○
虛○費○資○糧○兼○恐○撓○敗○軍○陳○故○也○諸○道○監○軍○請○皆○停○罷○
衆○齊○令○一○必○有○成○功○又○朝○廷○本○用○田○布○令○報○父○讐○今○

全師出界數月不進蓋繇此軍累經優賞兵驕將富
莫有爲用况其月費計錢二十八萬緡告更遷延將
何供給此尤宜早令退軍者也苟兵數不抽軍費不
減食既不足將何以安不安之中何事不有况有司
迫于供軍百端歛率不惟用度交闕卽人心于是無
聊自古安危皆繫于此惟陛下念之疏奏不省武宗
會昌年初李德裕以韓全義以來將帥出征屢敗其
弊有三一者詔令下軍前有三四宰相多不預聞二
者監軍各以意見指揮軍事將帥不得專進退三者

每軍各有官者爲監使。悉選軍中驍勇數百爲牙隊。其在陳戰鬪者皆怯弱之士。每戰監使自有信旗。乘高立馬。以牙隊自衛。視軍勢小却。輒引旗先走。陳從而潰。德裕乃與樞密使楊欽義劉行深議約敕之。自樂回鶻至澤潞罷兵。皆守此制。自井中書進詔意更無他詔。自中出者號令既簡。將帥得以施其謀畧。故所向有功。嘗試論之。漢定天下。置材官于郡國。京師有南北軍之屯。後平百粵。更增七校。有四夷之事。旋授中府之甲。入卿出將。無文武之常位。因事立號。無

名職之定稱故五營六郡之旅事畢解散貳師下瀕
之官功成輒罷而將軍奉朝請矣是以終漢之世無
弄兵內侮之禍東都之後四方分裂重兵在邊驍將
總戎強臣執權國從外理故叛亂接踵顛危相逐唐
氏一統乃因隋制內設諸衛以處武臣外布府兵以
隸諸衛四方有變選將于朝調兵于府建牙而出凱
歌而旋將軍就第矣郡縣有守禦之備朝廷無權重
之臣不耗帑財不費廩餼誠天機平康之道也至于
景雲之初如止節度之號以雄邊鎮以寵勲臣行則

建節府樹六纛得以軍事專殺而方面始大及明皇
天寶之末昏惑不事邀功競進之將獻謀于恢拓當
國執政之臣務專乎寵利兼道開鎮地逾四履銳卒
殲于沙磧邦財空乎上林蓋中原無擊柝之虞而北
兵排乎函谷矣繇是憤兵悍將連衡接勢東擊西應
朝降幕叛更相禽獵或自募逐生民焦灼勦絕耗斲
肅代之後中官得政行軍始于輔國軍容自乎朝恩
暨德宗之興元置中尉于神策兵權國命盡在北司
矣蘭錡虎臣皆其子蓄方岳戎帥率自賄成至有市

井賈販之夫。臺與廝養之賤。折券而取千里。諂附而得通都。至于蹈利于賞。壞法侵紀。姑息假借。養成驕孽。君位天祿。如從其質。質以居焉。故唐氏之基圖。終爲藩臣所損。且古之賢臣。在國則爲相。在軍則爲將。商則阿衡。佐升陞之代。周則尚父。領渡盟之師。姬旦東山之征。以冠淮奄。孔子夾谷之會。以折齊萊。漢高文之朝。命相于諸將之列。武宣之後。轉軍爲執政之官。留侯漢祖之謀。臣未嘗親矢石。高密光武之元勳。參則理穎豆。孔明處士也。西據荊州。建蜀三分之勢。

元凱書生也。東平吳會成晉一統之基。江右五朝。兵
官尤重。二衛四軍五戟七帥。皆選朝廷清重之士。縉
紳名望之流。介冑武人。非所預也。唐初大臣入爲三
公。八座出爲行臺總管。故自三代而至唐氏。莫不合
兵農而議政。通文武以命官。是故苟有制勝之術。何
必擊刺之利。乃爲勇。苟有經邦之道。何必章句之學。
乃爲文。若夫積恩澤以稍遷。階奔走之勤舊。以敢死
爲武。以引強爲材。羸股肱而決射御。程軀幹而角健
捷。此庸謂匹夫之敵一隊之長。又豈將之云乎。

宋初諸將奮自草野出身行伍與屠狗販繒者無異及見于用皆卓然自樹蹕御之得其道也初太祖嘗以李漢超爲關西兵馬都監超至關南民有訟其強娶已女爲妻及貸民錢不償者太祖召謂曰汝女可適何人曰農家又問漢超未至關南時契丹何如對曰歲苦侵暴今復爾邪對曰無也太祖曰漢超朕之貴臣汝女爲之妾不猶愈爲農夫乎且漢超不在關南汝家尚能保其貨物邪責其人而遣之密使諭漢超曰亟還其女并所貸朕姑貰汝勿復爲也不足于

用何不以告朕邪。漢超感泣。繇是益修政理。齊州吏民愛之。郭進爲山西巡檢使。進威令嚴肅。常有軍鼓。自山西詣汴。誣訟進不法事。太祖預知其情。送進令殺之。會北漢來侵。進謂其人曰。汝敢論我。信有膽氣。今貫汝罪。汝能掩殺殺敵兵。當卽薦汝。如敗。可自投河東。其人卽踴躍赴戰。大致克捷。進卽以聞。乞遷其職。太祖卽從之。乾德二年冬。王師征蜀。京師大雪。帝設氊帷于講武殿。衣紫貂裘。帽以視事。忽謂左右曰。我被服如此。體尚覺寒。念西征將帥。衝犯霜霰。何以堪。

處卽解裘帽遣使馳驛賁賜王全斌且諭旨諸將不
能徧及全斌拜賜感泣五年全斌等平蜀還有罪責
降全斌爲崇義畱後開寶末車駕幸洛陽郊祀召全
斌侍祠以爲武寧軍節度謂之曰朕以江左未平慮
征南諸將不遵紀律故抑卿數年爲朕立法今已克
金陵還卿節鉞仍賜銀器萬兩帛萬匹錢千萬開寶
七年遣曹彬伐江南帝戒彬曰江南之事一以委卿
切勿暴掠生民務廣威信使自歸順不須急擊也且
以劍授彬曰副將而下不用命者斬之潘美等皆失

色自王全斌平蜀多殺人上每恨之彬性仁厚故專
焉初彬之總師伐唐也帝謂曰俟克李煜當以卿爲
使相潘美預以爲賀彬曰不然夫是行也伏天威遵
廟謨乃能成事吾何功哉況使初極品乎美曰何謂
也彬曰太原未平耳及還獻俘帝曰本授卿使相然
劉繼恩未下姑少待之美視彬微笑帝詰之美以實
對帝亦大笑乃賜彬錢五十萬彬退曰人生何必使
相好官不過多得錢耳至是乃拜樞密使嘗以姚內
斌爲慶州刺史謂近臣曰安邊御衆須是得人若分

邊寄者能稟朕意則必優恤其家屬厚其爵祿多與
公錢聽其召募驍勇以爲爪牙苟財用豐盈必能集
事朕雖減後官之數極于儉約以備邊費亦無所惜
也○當是時太祖之置將也隆之以恩厚之以誠富之
以財小其名而崇其勢畧其細而求其大久其官而
責其成每朝必命坐賜與優厚撫而遣之嘗令有司
爲郭進治第凡廳堂悉用甌瓦有司言非親王不可
用上日郭進控扼西山十餘年使我無北顧之憂進
豈減兒女邪此可謂隆之以恩矣取蓋遵誨于仇讐

取姚內斌于俘虜。皆用之不惑。郭進在山西嘗有軍
較。訟其不法。上曰。進御下嚴。是必罪人。懼進法。欲誣
進。以自免也。使中人梓以賜進。令詰而殺之。此可謂
厚之。以誠矣。西北邊軍市之租。多賜諸將。不問出入
往往賞賚。又輒以十萬。李漢超守關南。屬州錢七百
萬餘貫。悉以給與。漢超猶私販權賜。規免商筭。有以
事聞者。上卽詔漢超悉免。關征故邊將養士。足以得
死力。用間足以得敵情。以居則安。以動則勝。此可謂
富之以財矣。李漢超郭進皆終于觀察使。所居不過

巡簡使之名終不以大將處之然皆得以便宜從事
郭進在山西每遣戍卒諭之曰汝等謹奉教我猶赦
汝郭進殺汝矣其假借如此故郭進所至兵未嘗少
勦此可謂小其名而崇其勢矣王彥昇之好勇馮繼
業之自伐然彥昇之守原州繼業之守虛州皆邊境
以安此可謂畧其小而求其大矣何繼筠屯隸州二
十餘年董遵誨屯通遠軍四十年其餘皆不減十餘
年退境賴之此可謂久其官而責其成矣夫寵之以
非常之恩則其感深待之以赤心則其志固養之以

惠○則○其○力○足○小○其○名○而○不○撓○權○則○位○卑○者○有○赴○功○之○
心○而○勇○智○者○得○以○騁○畧○其○過○則○材○能○進○久○其○任○則○功○
利○悉○自○古○用○將○之○術○不○易○于○是○太○祖○兼○用○之○故○李○漢○
超○屯○閩○西○馬○仁○瑀○守○瀛○州○韓○令○坤○鎮○常○山○賀○惟○忠○守○
易○州○何○繼○筠○守○隸○川○以○防○北○虜○郭○進○控○山○西○武○守○琪○
戍○晉○州○李○謙○溥○守○隰○州○李○繼○勲○鎮○昭○義○以○禦○太○原○趙○
贊○屯○延○州○姚○內○斌○守○慶○州○董○遵○誨○屯○環○州○王○彥○昇○守○
原○州○馮○繼○業○鎮○靈○武○以○備○西○夏○其○族○在○京○師○者○撫○之○
甚○厚○郡○中○筦○權○之○利○悉○以○與○之○資○其○貿○易○免○其○所○過○

征稅許其召募亡命以爲牙爪。凡軍中事皆得便宜。○
繇是邊臣富貴能養死士。使爲間諜。洞知敵情。及其○
入○侵○設○伏○掩○擊○多○致○克○捷○。二十○年○間○無○西○北○之○憂○。以○
至○命○將○出○師○。平○西○蜀○。拓○湖○湘○。下○嶺○表○。克○江○南○。所○向○遂○
志○。蓋○能○推○赤○心○以○馭○群○下○之○所○致○也○。太○宗○大○平○興○國○
中○。以○楊○業○爲○雲○州○觀○察○使○。知○代○州○事○業○。自○雁○門○之○役○
契○丹○畏○之○。每○望○見○業○旗○卽○引○去○。主○將○屯○邊○者○多○疾○之○
。或○潛○上○謗○書○。斥○言○其○短○。上○皆○不○問○。封○其○書○付○業○。太○宗○
與○寇○準○言○及○將○師○。上○曰○。將○師○材○畧○固○不○求○其○備○。儼○量○

其能而川之上自節麾下至二千石第其功效而授之微勞盡甄下情必達下情必達則無猜貳之嫌微勞盡甄則無觖望之釁所以各務忠孝而固祿位悖亂不得而萌也時上官正爲西川招安使代王繼恩正本疆好凌人自謂平賊有勞受人主知無所顧忌數面攻兩川官吏之短而暴揚之衆積怨怒多上章訴其不法者太宗謂近臣曰人臣可任用者朕常欲保全正婢直而失于謙和每謗謗重朕須力與明辨然衆怨難犯恐其不能自全乃賜手札戒諭曰言者

君子之樞機○樞機之發○榮辱之主○不可不慎也○夫遇
事○輒發○悔不可及○儻自持無瑕而好面攻人之短○豈
謂喜怒不形于色耶○當以和輯遠民爲念○斯盡善矣○
正上表○謫真宗咸平中○幸大名府○詔訪群臣邊畧錢
若水○疏曰○孫武著書○以伐謀爲主○漢高將將○以用法
爲先○伐謀者○以將帥能料敵制勝也○用法者○以朝廷
能賞罰不私也○今傅潛領雄師數萬○閉門不出○坐視
邊寇○俘掠生民○上孤委注之恩○下挫銳師之氣○蓋潛
輩不能制勝○朝廷未能用法○使然也○軍法臨陣不用

命者○斬○今○若○斬○潛○以○徇○然○後○擢○如○楊○延○門○楊○嗣○者○五
七○人○增○其○祿○秩○分○授○兵○柄○使○將○萬○人○間○以○强○弩○分○路
討○除○孰○敢○不○用○命○哉○敵○人○聞○我○將○帥○不○用○命○退○則○有
死○豈○獨○思○遁○抑○亦○來○歲○不○敢○犯○邊○矣○如○此○則○可○以○坐
清○邊○塞○然○後○鑾○輅○還○京○天○威○攝○于○四○海○矣○周○世○宗○卽
位○之○始○劉○崇○結○敵○入○寇○敵○遣○其○將○楊○衮○領○騎○兵○數○萬
隨○崇○至○高○平○當○時○懦○將○樊○愛○能○何○徽○等○臨○敵○不○戰○世
宗○大○陳○宴○會○斬○愛○能○等○拔○偏○將○十○餘○人○分○兵○擊○太○原○
劉○崇○聞○之○股○慄○不○敢○出○卽○日○遁○去○自○是○兵○威○大○振○其○

後○收○淮○甸○下○秦○鳳○平○關○南○特○席○捲○爾○以○陛○下○之○神○武○
豈○讓○世○宗○乎○此○今○日○禦○敵○之○奇○策○也○若○將○來○安○邊○之○
術○請○以○近○事○言○之○太○祖○朝○制○置○最○得○其○宜○止○以○郭○進○
在○邢○州○李○漢○超○在○關○南○何○繼○筠○在○鎮○定○賀○惟○忠○在○易○
州○李○謙○溥○在○隰○州○姚○內○斌○在○慶○州○董○遵○晦○在○通○遠○軍○
王○彥○昇○在○原○州○但○授○緣○邊○巡○簡○之○名○不○加○行○營○部○署○
之○號○卒○皆○十○餘○年○不○易○其○任○立○邊○功○者○厚○加○賞○賚○其○
位○皆○不○至○觀○察○使○蓋○位○不○高○則○朝○廷○易○制○任○不○易○時○
邊○事○盡○知○然○後○授○以○聖○謀○來○則○掩○殺○去○則○勿○追○所○以○

十七年中北邊西藩不敢犯塞。以至屢使乞和。此皆
陛下之所知也。苟能遵太祖故事。慎擇名臣。分理邊
郡。罷部署之號。使不相統轄。置巡簡之名。俾遞相救
應。如此則出必擊寇。入則守城。不數年間。可致邊烽
罷警矣。咸平二年。右正言孫何疏曰。將者人之司命。
國家安危之主。故有築壇告廟而授者。有推轂分閫
而遣者。軍功爵賞。皆決于外。參佐僚屬。許之自辟。昔
趙衰舉卻縠于晉侯。曰。興詩書而閱禮樂。晏嬰薦穰
苴于齊侯。曰。文能附眾。武能却敵。歷代將帥。多出儒

者○光武有鄧禹○劉備有諸葛亮○西晉有羊祜杜預東
晉有祖逖謝玄○符堅則有王猛○後魏則有崔浩○梁則
有謝艾○隋則有高頻○至于唐室儒將尤多○若郭元振
之鎮隴右○狄仁傑之帥河北○裴度之平淮蔡○溫造之
定興元○此數臣者○皆有導主庇民之功○善始令終之
德○一時武臣未有出其右者○朱梁後唐以馬上爲治○
文武之柄始離爲二○文者專治筆硯○耻言軍旅之事○
武者徂習戈戟○罕有帷幄之謀○交相是非○坐觀成敗○
今塞北有未賓之狄○河西有強項之羗○偶未成擒○病

在此耳。夫善師不陣。上將伐謀。事權宜專。號令貴一。
古者元戎之外。餘皆偏裨。近代加以副貳參以監臨。
事有嫌疑。動相牽制。而爲將者又多武人。崛起軍候。
稍遷恩。不足以懷雜虜。威不足以御群較。或逗遛而
玩寇。或險果而輕敵。蓋選將之術。任人之道。或有所
未盡故也。今之節度使。昔之太行臺。今之都部署。昔
之大總管。將帥列銜。至今猶帶度支營田等使者。蓋
元戎之任。無不統攝也。原其責成之道。欲使民不告
勞。師有必勝。且耕且戰。足食足兵也。爰近代始有供

軍糧料之名隨軍轉運之月使額既衆適從無所司

計者不知尺籍伍符之數握兵者不恤飛芻輓粟之苦群口交沸互相督責託稱上旨而實戾成算動必中覆而大費官帑陛下何惜上將之旗鼓通侯之印綬不于文資大臣擇訪委以節制勿俾武人擅其權勿使中使撓其事關外之漕輓一以付之境内之租賦權利一以與之使其有牛酒而犒軍有黃金而傾敵舊所謂監陳先鋒之類咸取偏將爲之仍令稟其節度與夫列較齊驅近臣迭往不可同年語矣慶曆

三年知諫院歐陽修上曰自用兵以來朝廷求將之法不過命近臣舉朝士換武官及選試班行方畧等人而已近臣所舉不過俗吏才幹之士班行所選乃是弓馬一夫之勇至于方畧之人尤爲乖濫試中者僅堪借職縣尉參軍而已于此求將而欲捍當今之患此所以困天下而敗于夷狄者也不知朝廷以此數事爲求將之術果是乎果非乎爲是則所得何人知其非則盍思改革又不知朝廷以將爲易得乎爲難得乎爲易則數歲未見一人知其難得則當多方

用意蚤賜采擇俟其臨患何可得乎伏望特詔兩府大臣別議求將之法盡去循常之格以求非常之才苟非不次以用人難弭當今之大患伏見唐及五代至乎國朝征伐四方立功行陣其間名將多出軍卒只如西鄙用兵以來武將可稱者往往出于軍中臣故謂只于軍中自可求將試畧言求將之法先取近下禁軍至廂軍中年少有力者不拘等級因其伎倆每百人團爲一隊而教之較其伎精而最勇者百人之中必有一人矣得之以爲隊將此一伎勇實服其

百人矣。以爲百人之將可也。合十隊將。而又教之。其伎精而最勇者。十人之中必有一人矣。得之以爲裨將。此一人之伎勇。貫能服其千人矣。以爲千人之將可也。合十裨將。而又教之。夫伎勇出千人之上。而難爲勝矣。則當釋其識。見知變通者。十人之中必有一人矣。得之以爲大將。此一人之伎勇。乃萬人之選。而又粗知變通。因擇智謀之佐。以輔之以爲萬人之將可也。幸而有伎勇不足而才識出乎萬人之外者。此不世之奇將。非常格之所求也。誠能如此。得五七

萬兵隨而又得萬人之將五七人下至千人百人之將皆自定然後別立軍名而爲階級之制每萬人爲一軍以備宿衛有事則行師出征無事則坐威天下比夫以豐衣厚祿養驕情無用之卒而遽遷以補至于較師皆是凡愚暗懦之人得失相萬矣若臣之說果可施行俟成一軍代舊禁兵萬人散出之使就食于外新置之兵便制其始稍增舊給不使大優常役其力不令驕情比及新兵成立舊兵出盡則京師減冗費得精兵比之爲利又遠矣蘇軾策畧曰天子必

有所私之將將軍必有所私之士○視其勇者而陰厚
之○人之有異材者雖未○有功○而其心莫不自異○自異
而○上○不○異○之○則○緩○急○不○可○以○望○其○爲○倡○故○凡○緩○急○而
官爲倡者○必其○上○之○所○異○也○昔漢武帝欲觀兵于四
夷○以逞其無厭之求○不愛通侯之賞○以招勇士○風告
天下○以求奮擊之人○然卒無有應者○于是嚴刑峻法
致之死地○而聽其以深入贖罪○使勉強不得已之人
馳驟于死亡之地○是故其將降而兵破○敗天下○幾至
于不測○何者○先無所異之人○而望其爲倡○不巳難乎○

私者天下之所惡也。然而爲已而私之則私不可用。
爲其賢于人而私之則非私無以濟。蓋有無功而可
賞有罪而可赦者。凡所以愧其心而責其爲倡也。天
下之禍莫大于上作而下不應。上作而下不應則上
亦將窮而自止。方西戎之叛也。天下非不欲赫然誅
之。而將帥之臣謹守封畧。外視內顧。莫有一人先奮
而致命。而士卒亦循循焉。莫肯用力。不得已而出爭
先而歸。故西戎得以肆其猖狂。而吾無以應。則其勢
不得不重賂而求和。其患起于天子無同憂患之臣。

而將軍無腹心之士。西師之休十有餘年矣。用法益密而進人益難。賢者不見。異者不見。私天下務爲奉法循令。要以如式而止。臣不知緩急將誰爲之倡哉。秦少游策曰。將帥之難其人久矣。勢有彊弱。任有久近。敵有堅脆。地有遠邇。時有治亂。而勝敗之機不繫焉。惟其將而已矣。昔智氏以韓魏三國之兵伐趙。馬服君之子以四十萬之衆抗秦。可謂彊矣。而潰于晉陽。坑于長平。廉頗率老弱之卒守邯鄲。田單鳩創病之餘。保卽墨。可謂弱矣。而栗腹以摧騎刼以走。是

不在乎勢之強弱也。穰苴之用于齊，拔于閭伍之中。
也。一日斬莊賈，晉師罷去。燕師渡水而解，韓信之擊。
趙非素拊循士大夫也。背水一戰而擒趙王歇，斬成。
安君是不在乎任之久近也。以周瑜之望曹公，不啻。
虎狼而吳兵捷于赤壁，以玄德之視陸遜，甚于雛鷥。
而蜀師劔于白帝，是不在乎敵之堅脆也。東西異壤。
也。而鄧艾以鎚兵取成都，南北異冒也。而王鎮惡以。
舟師平關中，是不在乎地之遠邇也。夫以東晉之衰。
而謝玄得志于淝水，開元之盛而哥舒翰失利于潼。

閑是不在乎時之治亂也。故善將者勢無強弱任無
久近敵無堅脆地無遠邇時無治亂不用則已用之
無不勝焉。故曰惟其將而已矣。雖然有一軍之將有
一國之將有天下之將走及犇馬射中飛鳥攻堅城
破強敵所向無前此有勇之士一軍之將也出奇制
勝無窮如天地不竭如江河攻輒破擊輒服此有智
之士一國之將也福于已而禍于人則功有所不立
利于今而害于後則事有所不爲功成事畢自視缺
然無矜大之色此有道之士天下之將也古者闢外

之事將軍制之軍中不聞夫子之詔其委任責成如此
此非有道之士其可以輕付之哉國家將帥可謂盛
矣闕禮樂而敦詩書者肩摩而轂擊縱橫剽悍稱智
勇而號肉飛者至不可勝計然驛騎有赤白囊至則
廟堂之上爲之紛然進止賞罰皆從中決者何也豈
以爲將帥者皆智勇之人非有道之士不可獨任故
邪夫廟堂議邊事則王體不嚴將帥之權輕則武功
不立嗚呼可謂兩失之也臣以爲西北二邊宜各置
統帥一人用大臣材兼文武可任天下之將者爲之

凡有軍事惟以大義上聞進退賞罰盡付其手得以便宜從事如此則雖有邊警可以不煩廟堂之論而豪傑之材得以成其功矣徽宗時許翰疏曰兵家之法使貪者爲我爭愚者爲我死夫若是者非他有利以導之也則賞固不可以不厚雖然爵祿顯設于朝惟其得之難也是以人危身而取之使其欲而易得得而易克則人孰復肯輕身冒矢石陷堅拔敵爲國行此危事而求奇功哉故無功而賞則有功者怠效薄而賞厚則人無志于極功而國不收其偉績是賞

亦○不○可○以○不○審○也○昔景德間契丹犯澶淵真宗皇帝
親駕征之自是強虜請盟至今不復窺邊然而師還
賞功如大帥李繼隆等不過進階次加食邑雖周文
質身督所部射撻覽而殪之首帥旣亡虜衆遂潰然
亦不過小遷其秩而已又熙寧用兵安南郭達爲帥
大破賊兵于富良江自是交趾不敢復動神宗猶以
帥無大功斥其賞當是時燕達最有功不過進秩二
等蓋故時邊賞若斯之艱者將復有以用之故也比
者西師羌戎震懾然其桀黠反覆尚未可以保其往

而將吏之賞不可不留其未滿之意以待復用高宗時學士汪藻上疏曰方今所急者惟取將一事而取將之說有三一日示之以法二日運之以權三日別之以分何謂示之以法肅宗在靈武廣平王以兵二十萬復長安其權可謂重矣先驅不肅顏真卿効之王爲之不敢當闕而坐李祐夜入蔡州縛吳元濟其功可謂大矣違詔進馬溫造効之祐曰今日膽落于溫御史夫先驅不肅違詔進馬于軍政未有害也而二臣已不貸如此蓋小過不貸則惡之大者知朝廷

有人不復敢萌于胸中矣。何謂運之以權臣開駟將如馭馬必馭者之力足以勝馬然後周旋曲折唯我之聽不然竊銜詭轡毀首碎胸雖跬步之間不能使之前矣。漢高祖之于諸將其梟雄而難制者莫如韓信方其圍于滎陽漢固危甚人人懷去就之心高祖一旦入其軍中自稱使者卽臥內奪其印符麾召諸將易置之信益不知也。及信下魏代輒收其精兵以距楚既項羽死垓下則又盡奪其軍徙爲楚王以信之材而周旋曲折唯高祖之聽者豈不以其智足以

勝之耶。故信嘗曰。陛下不善將兵。而善將將。是信自
知其材。惟高祖足以制已。故甘心俛首爲之用。而不
辭也。大抵人君之于將帥。必有得其要領。而使之心
畏誠服者。謂解衣推食。始足以得其驩心者。果非也。
唐憲宗時。劉闢叛蜀。宰相杜黃裳度。惟高宗文足以
破之。而崇文素憚劉。使人謂曰。公不奮命者。當以
旌代崇文。懼盡力縛賊。以獻。是以旌代崇文者。黃裳
得其要領也。高祖之用韓信。其術豈亦出此哉。何謂
別之以分漢高祖謂功臣曰。諸君知獵乎。夫獵追殺。

獸者狗也而發蹤指示獸處者人也。今諸君徒能走得獸耳。如蕭何則發蹤指示者也。蓋古者用兵謀臣坐于帷幄之中。以出籌策。而將帥則聽命于前。爲之役。使此命之所以一而功所以成也。高祖所與謀者蕭何張良陳平而已。黥彭之徒不得而與也。蜀先主所與謀者諸葛武侯而已。關張之徒不得而與也。今謀臣之任宰相執政是已。而諸將皆得出入禁中。叅議其間。此曹何所知識。必不能上補聰明。不過入則希求恩澤。出則憑藉權勢而已。然則利于公而不利。

于私者必不肯以爲可行○便于已而不便于國者必
不肯以爲可罷○欲責其冒鋒鏑○赴死地○難矣○臣以爲
當律以朝廷之儀○毋使叅議論之餘○庶名分不至混
淆○而可以責其功效○是三說者果行○足以駕馭諸將
矣○何憂乎保民○何艱乎弭盜○何患乎遏寇哉○孝宗時
辛棄疾上美芹十論○其一有曰○行陣無死命之士○則
將雖勇而戰不能必勝○邊陲無死事之將○則相雖賢
而功不能必成○蓋人莫不重死○惟有以致其勇○則情
者○奮驕者聳而死○有所不敢避○嗚呼○此正鼓舞天下

之至術也。致之如何。曰：將帥之情與士卒之情異。而所以致之之術亦不可得而同。何則？致將帥之勇在于均任而投其所忌。貴爵而邀其所慕。致士卒之勇在于寡使而紓其不平。速賞而卹其已亡。請得而備陳之。今之天下其弊在于儒臣不知兵。而武臣有以要其上。揆閭外之事。朝廷所知者勝與負而已。所謂當進而退可攻而守者。則朝廷有不及知也。其意蓋曰：平時清要。儒臣任之。一旦擾攘。而使戎履矢石。吾且幸富貴矣。豈不能遂巡自愛而置賊以固位乎？向

者淮上之師有遷延而避虜者是其事也臣欲朝廷
于文臣中擇其廉重通敏者每軍置參謀一員使之
得以陪計議觀形勢而不相統攝彼爲將者心有所
忌而文臣亦因之識行陣諳戰守緩急均可以備邊
城之寄將帥有可進而攻之便彼知縉紳之士亦識
兵家利害必不敢依違養賊以自封而遺國家之患
此之謂均任而投其所忌凡入之情未得志則冒死
亡以求富貴已得志則保富貴而重其生古人論御
將者以才之大小爲辨謂御大才者如養驥驥御小

才者如養鷹犬然向者虹縣海道之帥有得一邑破
數艦而遽以節越使相與之者是其事也臣欲朝廷
靳重爵命齊量其功等第而與之非謂無子謂徐以
予之且欲使之常臺臺然有欣慕未足之意以要其
後效而戒論文吏非有節制相臨者必以資級爲禮
彼被介冑者知爵命之可重而朝廷無左右貴賤之
別則亦矜持奮勵盡心于朝廷而希尊榮之寵此之
謂貴爵而激其所慕者也又楊萬里疏曰臣聞聖人
之所以鼓舞天下使之奔走淬礪以爭先于爲用長

而○不○亂○有○急○而○不○可○乘○者○蓋○聖○人○不○視○天○下○以○其○
可○窺○而○作○天○下○以○其○不○自○止○如○此○而○已○矣○今○天○下○之○
所○以○患○于○無○才○而○才○尤○患○于○無○將○其○病○在○高○者○趨○文○
科○以○售○其○身○下○者○伏○于○農○商○其○精○銳○果○敢○者○有○所○挾○
而○莫○之○用○則○去○而○爲○盜○賊○一○旦○邊○事○動○而○無○將○則○茫○
茫○然○以○求○之○而○天○下○莫○之○趨○夫○如○是○焉○得○將○昔○者○成○
王○周○公○承○文○武○平○定○之○業○誅○三○監○征○弗○庭○而○天○下○服○
矣○于○是○酌○堯○舜○夏○商○之○禮○樂○法○度○補○葺○成○就○以○至○于○
大○備○當○此○之○時○文○物○煥○于○朝○頌○聲○被○于○野○太○平○之○美○

天下之所甚樂○成王周公之所甚懼○非懼夫太平也○
懼天子窺吾君臣之樂○夫太平而彼亦樂之以至于
亂也○則有大司馬之官○日夜選將閱戎○如是而爲車
徒○如是而爲鼓鐸鉦饒○如是而爲坐作進退○後至者
誅○不用命者斬○夫下閔者非真臨陣而應敵也○後至
者何至于誅○不用命者亦何至于斬哉○而其法如此○
蓋其所以處暇裕之日○與處三監未誅之時○無異也○
則天下何以窺上之無所事我○而我○不爲也哉○是故
文武並用而莫知其孰先○莫知其孰後○不見其所甚

好○不○見○其○所○不○好○才○素○備○而○無○一○旦○之○憂○後○之○君○臣○
狙○于○治○而○謂○天○下○不○復○亂○也○則○日○汝○不○逢○帝○時○萬○尸○
侯○何○足○道○哉○而○羽○林○子○弟○受○經○于○學○較○與○夫○將○軍○不○
好○武○而○其○子○皆○能○文○則○君○臣○相○慶○以○爲○太○平○之○盛○觀○
而○腐○儒○曲○生○又○從○而○諛○之○而○天○下○以○兵○爲○諱○以○武○爲○
慚○矣○臣○願○天○子○增○重○武○事○不○敗○于○有○事○之○時○訪○求○將○
才○不○啻○如○有○事○之○初○而○宰○相○大○臣○亦○折○節○以○下○才○畧○
武○勇○之○士○毋○責○其○鄙○野○之○狀○而○怒○其○桀○岸○之○氣○時○賜○
之○燕○閒○而○延○見○之○以○陰○求○天○下○之○奇○傑○待○之○異○而○養○

之○久○此○所○謂○不○示○天○下○以○其○可○窺○而○作○天○下○以○其○不○
自○止○者○也○則○緩○急○之○際○亦○何○至○于○茫○茫○然○以○求○之○哉○
又○曰○臣○聞○今○之○議○者○曰○選○將○莫○若○宿○望○而○新○進○者○未○
足○用○也○臣○竊○以○爲○不○然○選○將○之○與○任○相○似○而○大○不○同○
是○故○相○不○厭○舊○而○將○不○厭○新○擇○相○而○不○以○舊○不○足○以○
壓○天○下○之○望○選○將○不○以○新○不○足○以○激○天○下○之○才○蓋○天○
下○之○相○必○道○隆○而○德○重○名○節○全○而○才○畧○高○天○下○之○人○
曉○然○服○其○可○以○相○也○是○惟○無○相○相○之○而○天○下○無○異○論○
故○曰○相○不○厭○舊○至○于○將○則○不○然○夫○所○爲○宿○將○者○功○業○

就矣。名位高矣。富貴極矣。腴田甲第金玉寶貨充乎其家。歌童舞女酣宴沈浸汨乎其心。昔之精明之謀者。將暗然而勇。果之氣者。將廢然矣。天下有事。使之舍所甚樂。而任其所甚憂。取甚愛之身。而捐之。必死之地。彼則畏矣。以今之畏。合前之驕焉。往而不敗。故曰。將不厭新。李廣之在漢。驍雄傑出。其君知之。天下知之。匈奴亦知之。廣之心翹然以無人視天下。自以爲漢將。非我則不可也。然衛青霍去病崛起于戚里之中。與單于角勝負。深入大幕。直擣龍庭。而廣乃以

失期無功死。開元之後。王忠嗣哥舒翰之威名。邊功天下第一。天下之人以爲一日不可無忠嗣與翰也。及幽陵盜起。廟堂失措。忠嗣則不存。而使翰則又敗。復兩京。平安史者。乃一未有功之子儀。而忠嗣部曲中之一光弼也。當廣之盛時。忠嗣與翰有大功名之。日天下豈知有衛霍李郭哉。然則宿將之與新進。未易以相輕重也。且人之有才者。孰無自喜之心。而人之于富貴功名。孰無願欲之志。自喜其才。則必求所以自試。志乎富貴功名。則求所以自取。此如善書者。

樂于爲人書而嗜酒者可以得酒則無不爲也不圖其自試之心而激之以自取而曰吾必得宿將亦惑矣故臣以爲今日之取將莫若以新儒士之通敏沈雄者行陣之嘗有聞者武舉之有所蘊而不徒虛文者士卒之有能而自異者卑賤有挾持而不自達者豪猾有過而其才可贖者君相留意焉不測而識之于稠人之中無故而置之萬衆之上庶幾乎如高帝之得韓信者又患天下之無將也哉

何大復論曰任將而中制者敗用兵而外監者

疑夫獨任者事成之宰也。專令者勢行之機也。故掣于中者垂成而敗。撓于外者已行而反。夫所貴于騏驎者必至也。然繫其足則駑馬先之矣。所勇于孟賁者必敵也。然縛其手則女子勝之矣。夫任將用兵之所尚者。在事必成而勢必行也。爲中制以掣之。立外監以撓之。是繫騏驎之足而縛孟賁之手也。故繫騏驎之足者不可望其必至。縛孟賁之手者不可望其必敵。用將而監制之者。不可責其成功。夫功以時會也。賞

罰所以勵功也。便宜所以乘時也。獨任者自制其賞罰而專令者得行其便宜者也。是以功可就而時不可失也。夫功者事之集也。時者勢之會也。故披刃冒矢以爲功也。羸糧躍馬以爲時也。故中制則事不一而績墮。外監則志不一而日曠。夫威者貴神速也。幾者貴立斷也。事以威立也。勢以幾行也。故任將者必假之神速之用。而子之以立斷之權矣。夫多指亂視多言亂聽。千人輿瓢亡不破者也。千夫牧羊無不擾者也。

故以一御衆則衆志定以衆制一則群疑生是
故千人與馮不如一人負而趨也千夫收羊不
如一人驅而走也古者天子之遣將躬爲推轂
日闢以外將軍制之故吳王用孫子而寵姬馮
魏王用穰苴而莊賈誅二君者非不顧寵幸也
知將不可以寵幸奪也淮陰一拜而爲漢大將
再捷而爲齊假王使高祖中制而外監之無以
提項氏之權而制天下之命矣故期功者不惜
神速之用知時者不吝立斷之權昔燕用樂毅

而伐之以騎劫。卒使田單收其降城。趙川卒牧
而代之以趙括。卒使白起坑其降卒。是故騎劫
爲田單之藉。而趙括爲白起之資。此制之者過
也。夫功罪者。責于將也。吾制之于已。而監之于
人。成則衆冒其功。敗則獨委其罪。未有善者也。
故善用將者。制其功罪。而不制其事。幾故士知
有將。將知有君。士知有將。則報義。將知有君。則
盡忠。

國朝任將

明興

高皇帝天授神武用兵料敵機變如神成

筭所授無不克捷諸將奉命成功不吝官賞

御

奉天門與創基論用兵謂基曰克敵在兵而制兵在

將○兵○無○節○制○則○將○不○任○將○非○其○人○則○兵○必○敗○是○以○兩

軍之間決生死成敗之際有精兵不如良將基對曰

臣每得侍左右觀妙筭初爲未必皆然及至摧鋒破

敵動若神明臣繇是知任將在上將之勝不若主之

勝也○然臣觀陛下常不拘古法而勝此尤所難

上曰戰者謀也因敵制勝豈泥于古哉初洪武元年諭曰爾諸大臣既受封爵可謂尊顯矣太抵開基創業之主待功臣非不欲始終盡善如韓信彭越自不能保全其功深可惜哉至承平之後舊臣多有獲罪者究其所以蓋其事主之心日驕富貴之志日滿以致于敗古人致欹器於座側以戒其驕盈耳汝等宜戒慎之又謂都督同知康茂才等曰汝等今成大功豈汝一人之能哉非軍士同心協力曷能致此古之人工待其臣下徃徃以權術駕馭不以至誠相

感易生猜疑故人心生變今吾以直言常相警戒非止在於汝身汝又當以此意訓及子孫與國同久時皇太子侍側上指謂之曰太子年勿未歷世故朕嘗以此意誨之使他日汝子成立與吾兒共享太平常如今日則子子孫孫無有窮也羣臣皆謝而退是年太祖遣徐達等北伐召諸將諭之曰征伐所以奉天命平禍亂安生民故命將出師必在得人今諸將非不健闘然能持衆師有紀律戰勝攻取得爲將之體者莫如大將軍徐達當百萬之衆勇

敢先登摧鋒陷陣所向披靡莫如副將常遇春然不
患遇春不能戰但患其輕敵耳吾前在武昌親見遇
春纔遇數騎戰卽輕身赴之彼陳氏如張定邊者何
足稱哉尚據城指揮春爲大將顧與小校爭能甚非
所望切宜戒之若臨大敵遇春雖領前鋒或敵勢强
則遇春與叅將馮宗異分爲左右翼各將精銳以擊
之左丞薛顯叅政傅友德皆勇畧冠諸將可各領一
軍使當一面或有孤城小敵但遣一將有膽畧者付
以總制之權皆可成功達則專主中軍策厲羣師運

籌○法○勝○不○可○輕○動○古○云○將○在○軍○君○不○與○者○勝○汝○等○其○
謀○之○又○謂○達○曰○閩○外○之○事○汝○實○任○之○茲○行○必○自○山○東○
次○第○進○取○山○西○古○云○十○二○山○河○之○地○師○行○之○際○須○嚴○
部○伍○一○衆○心○審○進○退○之○機○適○通○變○之○宜○使○戰○必○勝○攻○
必○取○我○虛○而○彼○實○則○避○我○實○而○彼○虛○則○擊○之○將○者○三○
軍○之○司○命○立○威○者○勝○任○勢○者○強○威○立○則○士○用○命○勢○重○
則○敵○不○敢○犯○吾○嘗○與○諸○豪○傑○並○驅○觀○其○取○敗○者○未○有○
不○繇○威○不○立○而○勢○輕○也○汝○其○慎○之○已○而○達○等○師○連○克○
捷○

太祖遣人

諭曰聞將軍已下齊魯諸郡中

外○皆○慶○予○獨○謂○勝○而○能○戒○者○可○以○常○勝○安○而○能○警○者○
可○以○常○安○戒○者○雖○勝○若○始○戰○警○者○雖○安○若○屢○危○夫○屢○
勝○之○兵○易○驕○久○勞○之○師○易○潰○能○慮○于○敗○乃○可○以○無○敗○
能○慎○于○成○乃○可○以○有○成○必○須○關○防○謹○密○常○若○臨○敵○勿○
生○懈○怠○爲○人○所○乘○慎○之○慎○之○二○年○上○遣○使○齎○勅○
至○太○原○諭○諸○將○曰○古○人○功○高○自○以○爲○平○常○功○平○常○
自○以○爲○無○功○此○古○賢○哲○之○道○也○至○若○國○家○賞○有○功○罰○
有○過○必○不○以○功○高○爲○平○常○平○常○爲○無○功○近○者○大○大○湯○
和○定○浙○左○平○閩○中○平○章○楊○璟○靖○潮○湘○定○廣○西○班○師○還○

朝未曾定賞爲大將軍等滅胡未還故也於是再遣
各官從大將軍征遼以湯和爲偏將軍楊璟聽調其
璟兵出澤趨潞中道與賊相拒雖少筭以累軍此亦
兵家常事耳太原之捷得此爲掎掇以分其勢可不
謂奇乎今定左副將軍馮宗異居遼春之下偏將軍
湯和居宗異之下偏將軍楊璟居和之下協力同心
剪除餘虜又嘗諭湯和曰軍中之事難于執一惟
當以德服人必其負固弗順然後以威鎮之凡推德
必先邇者邇者遠之所瞻示威必先大者大者小之

所○憑○逼○服○則○遠○來○大○懾○則○小○懼○又○曰○若○欲○人○不○違○已○
當○使○之○以○信○欲○人○成○功○當○任○之○以○專○不○信○則○令○不○一○
不○專○則○權○有○所○分○三○年○大○將○軍○徐○達○逐○王○保○以○偏○將○
胡○德○濟○失○律○械○送○至○京○上○念○其○舊○勞○特○命○宥○之○
仍○遣○使○一○勅○諭○達○曰○右○丞○胡○德○濟○臨○事○畏○縮○將○軍○不○
以○軍○法○從○事○乃○械○送○京○師○必○欲○朝○廷○治○之○將○軍○
欲○効○衛○青○不○斬○蘇○建○獨○不○見○穰○苴○之○待○慈○賢○乎○且○慢○
軍○功○者○悉○歸○之○朝○廷○則○將○軍○之○威○玩○而○號○令○不○行○
矣○胡○右○丞○之○失○律○正○當○就○軍○中○戮○之○足○以○警○衆○所○謂○

關外之事將軍制之若送至朝廷則須議其功過
又非關外比矣彼常有救信州之功守諸暨之勞故
不忍加誅懼將軍緣此緩其軍法是用遣使卽軍中
諭意自今務威克厥愛毋事姑息時監察御史袁凱
言國家蕩平四海固資將帥之力然今天下已定將
帥多在京師其精悍雄傑之士督兵有餘而於君
臣之體恐未悉究臣願於都督府延致通經學古之
士或五人或三人每於諸將朔望早朝後俱赴都堂
聽講經史庶幾忠君愛國之意全身保家之道油然而

日生天生人材無非爲天下國家計其羣小無廉恥
之人有犯固在不赦至於老成長者或有過誤宜加
矜恕養廉恥以收他日之功則人材輩出矣上嘉
納之遂勅省臺延聘儒士於午門番直與諸將說
書二十年上以中外武臣多出自戎伍罔知憲典
故所爲徃徃麗法乃親製大誥三十二篇以訓之
俾知守紀律撫軍士立勲業保爵位頒之中外永爲
遵守二十一年上又以將臣於古者善惡成敗之
事未能通曉特命儒臣編集中明以鉏麇樊噲金

日碑張飛鍾會尉遲敬德薛仁貴王君廓僕固懷恩
劉闢王彥章等所爲善惡爲一編釋以直辭俾蒞武
職者日親講說使知勸戒時廣西江西指揮耿良戴
宗以科歛激變致亂坐罪上曰武臣不知受命守
禦之方與夫崇名譽享富貴祿及子孫之道乃爲保
守勅頒使覽觀知勸戒時定制凡武職歲六選
官二等曰舊官曰新官皆有流有世曰襲職曰替職
其幼也曰優給不得世者曰減革曰通革非真授者
曰試職曰署職曰納職凡首功四等曰北虜曰遼東

女直曰內番苗蠻曰內地反賊凡戰功二等曰奇功
曰頭功凡賞三等曰加賞曰給賞曰量賞凡推陞勲
臣若武舉薦舉會舉二人上請凡土官六等曰宣慰
宣撫招討安撫長官千夫長其子弟族屬若妻婿女
甥皆得從其俗凡夷官自都督至於鎮撫凡十四等
皆以誥勅辨冒偽凡傳陞乞升非軍功陞者得執
奏以考選比試併鎗達材而程力以部功課將領以
遞降練卒徒以貼黃正圖狀以初績徵誥勅以褒
卹勵死戰以便優養恩故絕以引類登選簿以嚴

先○后○進○敵○激○叛○肅○軍○機○以○典○刑○敗○倭○行○封○退○陞○世○
祿○以○寄○祿○馭○恩○倖○以○覈○訊○糾○捕○緝○八○月○丁○卯○征○虜○將○
兵○還○朝○於○是○論○功○行○賞○上○賦○平○湖○詩○二○章○命○
群○臣○和○之○御○製○論○武○臣○勅○頒○之○將○士○一○曰○守○邊○之○
將○撫○軍○以○恩○二○曰○邊○境○城○隍○務○宜○高○深○三○曰○修○築○城○
池○葺○理○以○漸○四○曰○操○練○軍○士○習○於○閑○暇○五○曰○軍○士○頓○
舍○勤○於○點○視○六○曰○體○念○軍○士○毋○以○加○害○七○曰○事○機○之○
會○同○僚○盡○心○八○曰○沿○海○衛○所○嚴○於○保○障○凡○八○條○頒○之○
將○士○永○爲○遵○守○二○十○七○年○上○諭○自○今○武○官○子○弟○宜○

於閑暇時令習弓馬當承襲者五軍都督府閱試其
騎射閑習者方許否則雖授職止給半俸候三年復
試之不能者謫爲軍著爲令一日朝罷退坐東閣
召諸武臣問之曰爾等退朝之暇所務者何事所接
者何人亦嘗親近儒生乎往在戰陣之間提兵禦敵
以勇敢爲先以戰鬪爲能以必勝爲功今閑居無事
勇力無所施當與儒生講求古名將之道爲鑑戒擇
其善者而從之則可與古賢將並矣嘗以春寒甚
命中書以府庫布帛製綿襖運赴薊朔寧夏等處給

軍士省臣對以有常供。上曰：天寒異常，故命加給耳。古人一夫不獲，引咎在躬。況守邊將士，平其給之，勿緩一日閔武罷。諭諸將曰：畜兵所以衛民，勞民所以養兵。爾等宜戒其恣縱體朕恤下之意。正貴能思賤，富能思貧者，善處富貴也。憂能同其憂，樂能同其樂者，善體衆情也。不遺下民之歆，斯能合上天之心。合乎上天之心，斯可以享有富貴矣。又嘗諭諸將校曰：自古帝王居安慮危，處治思亂。今天下初定，豈可遽以爲安而忘警戒？朕觀爾等所統軍士，懔然

不知簡練倘一旦有警將安用之朕昔下金華時館
於廉訪司有給掃除老兵數人能言元時點兵事使
者問其主將曰爾兵有乎曰有使者曰何在主將舉
所佩繫囊出片紙指其名曰盡在此矣其怠弛如此
及天下亂無兵可用乃集農夫驅市民爲兵至不能
彎弓發一矢駢首就戮妻子爲俘國之亡者實此輩
亡之也爾等可不戒哉

成祖用兵號令嚴明信

賞必罰分令應變機智如神臨敵對陣意思閑逸從
容自如及至決戰氣勇兼溢然不避動勞與士卒同

甘苦每食士未食不先食遇渴士未飲不先飲大戰
數十小戰無筭必先陷陣未嘗被創自大將而下及
于旗校悉識其能否勇怯臨陣指使各盡其用有先
退者各呼其姓名以故人爭先不敢後俘獲敵將置
于左右待之不疑人心悅服皆欲奮力自効凡經營
謀畫咸出上心至于攻城畧地指授諸將成筭從
上所言無不獲勝苟有作聰明自用者必無所成然
後嘆上之神筭無遺策也故能以少勝衆不四載
之間掃除姦惡內平福難奠安宗社成克復之功

永樂二年十月御史有言甘肅總兵官宗晟擅竊威權事多專制。上諭侍臣曰任人不專則不能成功。況大將受邊寄豈可盡拘文法。今當明與晟言使之釋疑。勅晟曰前者御史言欲舉其職耳夫爲將不專則功不立。旣付卿以闡外之寄事有便宜卽行而後聞自古明君任將率用此道。忠臣事君亦在推誠。朕素知卿委以重任彼雖有言卿勿置意但盡心邊務以付朕懷。十一月刑部奏奉天征討官有以罪繫獄者請論功定擬。上曰朝廷大公至正之道有

功則賞有過則刑刑賞者治天下之大法不以功掩過不以私廢公於此輩征討之功既醕爵以賞今有犯不罪是縱惡也何以治天下 宣德七年北直隸隆慶衛指揮同知袁泰等奏本衛同知李景鎮守居庸關調度有方行事得宜今缺指揮使請以任景通政司以聞上不從因召諸武臣語之曰爵賞當自朝廷此輩猶效唐河北事耶爲人臣者但當竭忠盡力爲國立功不患不富貴勿得越制以干憲典群臣皆頓首 宣宗因甘州衛千戶姚寧等奏

曲先之役多冒功升職因謂兵部尚書許廓等曰陞
賞之法所以酬前勞勉後效若有功不得則才勇之
人忿無功而得則僥倖之心啟宜令總兵官覆勘務
合至公正統時山西太原左衛卒張敬言頃者山
西獲賊官校之陞多非實功有所司受賂陰與擒獲
者有私賂獄賊誣平民于官後乃擒獲者有市他人
所獲爲已擒獲者夫賞當功則臣下勸罰當罪則奸
邪息此屬雖紿朝廷得官耳目不可塗也臣恐天
下皆然宜令公廉御史究之削其冒陞之職重寘

於法則奔競之路塞公正之門開都察院議宜行敬
言于天下從之武職在國初非有攻城畧地之
功雖千百戶不輕畧非從征而死事者至子孫亦多
不世襲也世襲子孫親弟姪年未及二十者襲職至
年二十乃比試年及者卽與試初試不中襲職署事
食半俸三年後再比不中者降充軍其立法之嚴如
此國初雖世襲法不濫也武職之濫也其自永
樂始乎革除年間衛所官旗軍有稱奉天征討守城
征哨拿人有功陞職者有稱全城歸順陞職者有稱

江上朝見并招船招人擒首奸惡逆叛等項俱作奉
天征討名目陞職者 永樂初令 洪武三十二年
至三十五年奉天征討有功陞職者爲新宦子孫年
十六出幼襲職替職免比試三十一年以前者爲舊
宦子孫年十五出幼襲替俱比試 永樂元年以後
與舊官同茲令也所以厚諸奉天征討者又如此武
職之濫其始於此乎 正統十四年有所謂被虜走
回遇駕拿馬者 天順初有所謂奪門迎駕者或以
陞職或以署職而得實授承襲往往有之雖然此猶

我祖宗於臣子非常之遇而施非常之恩有不許
後爲例者至天順間冒功買級紛紛于天下權勢
乞養奴隸足迹不出都邑而四方萬里一有征進功
賞文冊必鱗次其名焉官陞不極其任不止而子孫
又皆世襲也武職之濫其極於今日乎於是大學士
李賢言曰自古國家惟怕冗食今軍官有增無減一
衛官有二千餘員者且天地間萬物有長必有消如
人只生不死無處著矣自古有軍功者雖以金書鉄
券誓以永存然子孫一再犯法卽除其國豈累有罪

犯惡而不革其職者孟子曰君子之澤五世而斬一
終其身已爲厚矣況及其子若孫乎況無子若孫者
又及其旁支別派乎此國家大事不可不於無事之
時而預爲之調停一旦至無可柰何雖有智者不能
善其後矣時太傅安遠侯柳溥以禦寇無功取還旣
至上召賢曰溥爲將畏縮如此不懲何以警衆卽
命閑住數日溥以馬駝進上怒擲其奏曰無功戴
罪復愛其所獻可乎溥慚懼而退成化時給事中
秦崇言師克在和今鎮守者有善謀而巡撫者或言

其否巡撫者有奇笑。○總或者或指爲非。○進止殊。○
戰守異。○見何以成功。○憲應報曰。○人各有長。○朝廷所。○
以參用文武內外之臣。○正欲其彼此相資。○可否相濟。○
以共成王事耳。○苟各懷私護。○短幾何不遺邊患。○大抵。○
天下之事。○同則成。○異則敗者。○皆然也。○戒其異而勉於。○
同。○豈特邊臣然哉。○弘治四年。○兩廣總兵安遠侯柳。○
景在鎮。○貪暴不法。○都御史秦紘劾其狀。○逮景下刑部。○
獄。○刑部勒景奸贓鉅萬。○抵景於法。○褫其爵。○景圖報復。○
尋據他事。○誣紘。○紘亦被逮。○坐免。○景贓方入八百兩。○乃

援於戚畹壽寧侯忽內降蠲旨尚書彭詔上言

陛下優待貴近之臣如此臣固知陛下有所不得

已也但臣忝列守法之官不宜阿順以圖自便景職
數十未及一乃盡行蠲宥如物論何若職既可免他
日爵位亦可營求而復矣爵位既復遂可營求出鎮
矣奸朋藉口良善解體誠非國家之利正德年間

各處軍功之濫如鎮守官奏帶例該五名至領兵奏
帶三、四、百、名、者、有、之、往、往、安、居、京、師、寄、名、邊、方、故
有、一、人、而、數、處、奏、帶、一、時、而、數、處、獲、功、其、不、在、斬、馘

之列又復另立別名或曰運送神鎗或曰齋執旗牌
或曰衝鋒破敵或曰三次當先或曰軍前效勞紀驗
之地既無審覈之公銓選之司又無馭勸之實其改
正重陞併功加授之類私謀巧術難以枚舉至嘉
靖改元盡詔行革退積年宿蠹爲之一清蓋永
樂以前總兵無專官有事命將事平還朝後緣邊方
多事因留總兵官鎮守其地有小警卽調本鎮兵馬
剿之不報捷焉嗣後有撲殺或掩襲以取勝多事因
留者或七八十級或四五十級或三四路而併爲一

路或二三日詐爲一日。槩以捷音奏報。宣布于廷。奏捷者亦得陞賞。遂開冒功之門。至是濫極矣。卒至將多留賊以酌賞。賊勢愈熾。云陳氏建曰。當今天下冒濫叢積虛耗。國儲歲增。月益。無有紀極。不可不亟爲之限制者。武職世襲之弊是也。始也賞功之濫。夫賞功之典。無代無之。然歷考前代。惟有大功至封侯者。方得世襲。餘惟官爵終身。其首級功次多。則酌以金帛。或以勲格散官而已。國初武臣身經百戰。萬死得一生。方得世襲。指揮千百戶。今則無三首級。

卽陞官世襲矣。國初征戰斬獲受賞無非實功近

數十年報功一切虛詐冒濫矣。國初武臣廢例行

比試今則比試皆虛文矣。國初武職犯罪依律科

斷今則一切行姑息律。皆廢格矣。胡端敏世寧奏

議曰首級論功非我。國初舊制也。兩軍相敵當先

格鬪者手眼瞬息不得差池。何暇割首使割其首則

再不能戰而爲敵所乘爲後軍所爭奪死矣。故首非

我大勝彼大敗遠奔不能割。然割之者多非殺賊之

人。而又或殺已降或殺良民或偶得單行之賊被擄

逃○出○之○人○而○割○之○多○非○真○功○也○又○曰○臣○初○平○賊○江○西○見○彼○殺○賊○之○人○無○一○報○功○報○功○之○人○無○一○見○賊○反○後○充○軍○遼○東○見○彼○冒○功○之○人○勢○焰○燿○燿○總○鎮○官○奪○邊○軍○血○戰○所○得○之○首○級○以○與○之○報○功○又○有○等○身○不○出○京○而○寄○名○各○邊○地○之○相○去○各○數○千○里○而○或○同○時○皆○報○此○人○獲○功○其○虛○冒○何○可○也○又○曰○今○天○下○軍○職○有○罪○者○不○革○有○功○者○日○增○祿○日○多○民○財○有○限○將○何○以○給○昔○我○太○祖○高○皇○帝○優○厚○功○臣○雖○定○軍○官○子○孫○皆○得○世○襲○然○必○比○試○得○中○而○後○用○之○固○不○以○生○民○膏○血○養○無○能○之○

人也。欽定大明律有云：若軍官有犯私罪該管者，附過收贖杖罪解見任降等敘用，該罷職不敘者降充總旗，該從流者照依地里遠近發各衛充軍。若建立事功不次擢用，固不以朝廷爵祿賞有罪之人也。我祖宗立法之嚴如此，今論軍官私罪徒流以下，徑擬還職，雖雜斬絞亦止發立功，定以年限無功亦得還職，全非立法之意。縱惡孰甚焉？況今新官襲職比試亦爲故事，此輩自倚世襲不須才能，不畏罪黜恣爲驕貪，今天下軍職動數萬計，歲支俸給何啻

百○萬○而○其○間○無○一○人○堪○爲○將○領○能○出○戰○陣○者○此○所○以○
全○盛○之○天○下○而○坐○困○於○夷○虜○之○跳○梁○真○可○爲○之○流○涕○
也○則○今○日○之○所○當○釐○務○尚○孰○有○急○於○此○者○哉○謂○宜○凡○
有○征○戰○逃○選○疆○明○剛○正○之○人○以○爲○紀○功○之○官○痛○懲○此○
虛○冒○之○弊○明○詔○天○下○自○今○四○方○首○級○次○非○開○國○靖○
難○比○只○陞○職○止○其○身○不○許○世○襲○如○此○庶○可○杜○賞○功○之○
濫○乎○若○夫○廕○襲○之○法○宜○不○分○新○舊○官○皆○令○比○試○中○者○
准○襲○職○不○中○者○發○回○弓○馬○後○五○年○再○比○試○中○降○襲○一○
級○不○中○者○仍○發○回○又○五○年○再○比○中○者○降○襲○二○級○不○中○

者仍前施行其立功之祖無正支子孫者並停襲如
此庶可革廢襲之濫乎若夫犯罪一切依律問擬其
犯罪及永遠充軍者除其華父襲犯本身軍者降襲
二級其他罪犯並須待犯人身故然後許起送此試
如此庶可免縱罪之濫乎夫杜賞功之濫始可以窒
其源而武職不至日增革廢襲與縱惡之濫始可以
節其流而武職庶幾日減武職不日增而日減國家
財用其庶少紓乎

世宗一日問閣臣今取戶兵

工三部銀四萬兩犒薊鎮春防官軍一次可乎閣臣

對曰春防旣賞秋防將引爲例賞則不以爲恩不賞則適以生怨不若足其糧餉而銀賞則以待有功

世宗深然之御史屠仲律言諸禦寇不善用兵之弊先發後行尅期始動前軍未起先聲已聞弊一謀不預成計不先定實行突進動陷伏中弊二守不據險屯不列要弁急救難賊逸我勞弊三兵不專一主客雜聚猝遇狡賊易衣變飾突然前來不能別識弊四兵無素統將不預設一遇有警猝然命官本以烏合之人率以未經識面之將弊五法令姑息紀律不肅

進有必死之恐、退無伏鑽之慮、畏敵而不畏將、弊六
地形不習、險易不識、趨利不及、避難不蚤、弊七、糧糗
不儲、料理不周、遠兵勞役、撫卹未至、枵腹待斃、窮愁
思歸、弊八、士不精選、勇怯無辯、前擊後解、謹然而散、
雖悍夫勇士、以無援而力屈、或先奔而膽喪、弊九、九
弊不除、雖賁育執戈、莫能濟矣、

何大復子論曰、任將而中制者、敗、用兵而外監
者、疑、夫獨任者、事成之宰也、專令者、勢行之機
也、故掣于中者、垂成而敗、撓于外者、已行而反、

夫所貴於騏驥者必至也。然繫其足則駑馬先
之矣。所勇于孟賁者必敵也。然縛其手則女子
勝之矣。夫任將用兵之所尚者在事必成而勢
必行也。爲中制以掣之。立外監以撓之。是繫騏
驥之足而縛孟賁之手也。故繫騏驥之足者不
可望其必至。縛孟賁之手者不可望其必敵。將
而監制之者不可責其成功。夫功以時會也。
賞罰所以勵功也。便宜所以乘時也。獨任者自
制其賞罰而專令者得行其便宜者也是以功

可就而時不可失也。夫功者事之集也。時者勢之會也。故被刃冒矢以爲功也。羸糧躍馬以爲時也。故中制則事不一而績墮。外監則志不一而日廣。夫成者貴神速也。幾者貴立斷也。事以威立也。勢以幾行也。故任將者必假之神速之用。而予之以立斷之權矣。夫多指亂視多言亂聽。千人與瓢亡不破者也。千夫牧羊無不擾者也。故以一御衆則衆志定。以衆制一則羣疑生。是故千人與瓢不如一人負而趨也。千夫牧羊

不如一人驅而走也。古者天子之遣將躬爲推

轂。曰閭以外將軍制之。故吳王用孫子而寵姬

戮。魏王用穰苴而莊賈誅。二君者非不顧寵幸

也。知將不可以寵幸奪也。淮陰一拜而爲漢大

將。再捷而爲齊假王。使高祖中制而外監之。無

以摧項氏之權而制天下之命矣。故期功者不

惜神速之用。知時者不吝立斷之權。昔者燕用

樂毅而代之以騎劫。卒使田單收其降城。趙用

李牧而代之以趙括。卒使白起坑其降卒。是故

騎劫爲田單之藉。而趙括爲白起之資。此制之
者過也。夫功罪者責于將也。吾制之于已而監
之于人。成則衆冒其功。敗則獨委其罪。未有善
者也。故善用者制其功罪而不制其事。幾故士
知有將。將知有君。士知有將則報義。將知有君
則盡忠。

夏桂州論曰。善御者必有所縱也。故人主之權
無所不御。而有時乎不御。人臣之義無所敢專。
而有時乎專。則惟將爲然矣。且夫三軍國之太

阿而持以予人。顧何可以不御哉。蓋賢主之任人疑則弗用。用則弗疑。而况軍旅生民之司命。國家安危之所關。矜之愈重。則任之宜益專。任之益專。則縱之宜益甚。此將軍之時也。胡可制也。時不可制。則吾以縱爲御。縱不可常。則必有所以制之者在矣。故孫子曰。將能而君不御者。勝。讀者不察。以爲賢主任將。徒不御之而已。而不知不御之說。此賢主之所施於能將。而非所槩施於他將者也。能而後不御。不能吾將御之。

矣。然則將兵之權常在將，而將將之權常在君。所御大而不御者小。故主將一心而三軍齊力，勝不亦宜乎？世之爲君謀者曰：持大兵者如持盤水，正傾在俯仰，一致蹉跌，求止不得，柰何其弗慮之！且兵卒多則有弱幹之患，張弛擅則有尾大之虞。勲名盛則憂其難制，統轄久則懼其難收。刁閒之愛貴奴也，舉其資與之，以求什一之利，則持籌而計之，必使盈縮在手，而後能使豪奴自饒而盡其力。況捐千百萬之衆，出千百

里之外而可無御哉、故爲君謀者其說常在御、則善謀忠計也、爲將者則不然、曰將貴專威兵貴合變、握三軍之號令而受命於中、制則不專、制一時之利害而計定于千里、則失變、故明君必假之以建威之勢、而與之以制變之宜、世主不達斯義、一切以鈐制束縛之術施之、此荀林父敗績於邲郊、李廣刎首于絕塞、子儀失相州之利、曹彬損北伐之威、而忠臣志士所爲扼腕而太息也、御之亦何益哉、故爲將謀者其說常

在于不御則善謀忠計也孫于大將也持不御之說不可以通人主矣雖然孫子固曰將能而君不御者勝非謂凡將皆當不御而凡不御者皆勝也故知明主之權未嘗不予人而嘗不重予人予其所能者而靳予其所不能者則御將之道已夫能豈易言哉衝陷折關者槩之沉毅或不足不可謂能智畧輻輳者程之勇斷或不給不可謂能智勇出衆者本之忠義或不固不可謂能何者其材有所偏而其志有所可奪也

故夫任將者試之以五材、律之以五慎、觀之以
十過、稽之以八証、而將果能矣。于是有避殿之
召、有告廟之儀、有登壇之拜、有分閫之任。凡以
爲能將尊也、搦斧而授之柄、曰從此上至天者、
將軍制之、搦鉞而授之刃、曰從此下至淵者、將
軍制之。凡以爲能將專也。是故戰守異用、不撓
其機、衆寡異宜、不制其數、遲速異效、不責其期、
會賁賞易施、不問其出入、毋以盈庭之議、而間
帷幄之密謀、毋以懸億之言、而消當機之定筭、

凡以爲能將寬也、鼙鼓金鐸、聰有所不聞、而非
擁也、懼多言之亂聽也、旌旗麾幟、明有所不見、
而非蔽也、懼多指之亂視也、凡以爲能將信也、
如是故將權一、將權一故上足仰、上足仰故下
可用、是故無天于上、無地于下、無君于後、無敵
于前、萬物至而制之、萬物至而命之、惟吾所裁、
而他無所顧慮焉、是以將無疑謀、卒無二心、口
無還令、事無嘗試、師一出而四夷懾、白刃不畢
拔而天下服也、人見其圖利、無疆康正八極、以

爲將之功如是而不知君固有以縱之人見君之縱之如是而不知將之能固有以當之也蓋古稱善將者莫如漢高光武高帝之于韓信也請兵則兵請王王未聞有殊一方畧異一謀議者而馮異專制關中光武推心置腹其君臣父子之論懇然發于至誠彼二將者安得不殫智畢力報國士之遇而赴功名之會哉然有繇矣終灌諸公帝未嘗遣特將雖或特遣未嘗不稟受成筭而獨于信則不御知信之能也

諸將往往皆中繩墨歸管劍無飛揚跋扈之態而有戡定禍亂之畧光武之不御固宜矣夫御之爲言以馬喻也詭御泛駕之馬不得解羈馬解卽弗制有騏驥焉一日且千里令其乘風而之安得故以凡馬之御御騏驥不可望其必至以凡將之御御能將不可責其成功是在人主以不御之禮夫跛驚蹢躅人誰馮之而以御駕爲解胡不反視其能也抑此非奇理異論天下之恒也桓公任管仲人請事焉公一則曰仲父

再則曰仲父人曰君亦耳而目之乎公曰吾旣得仲父矣而復耳而目之是耳目人終無已也此亦能而不御之說也夫任人盡然而何疑於用將也

許穎陽論曰人君之馭將也其始則擇之精精則將得其人其旣則任之專專則將持其柄苟人有不得則雖貂蟬四布而干城之托無所歸柄有不持則雖貔虎雲屯而閭外之功無繇建是以精於擇而專於任者頗收集於禁中而皇

威遠播孫吳走於堂下而天策長驅矣昔漢之
選將也有良家智勇之異而復裂地以封之唐
之選將也有明習孫吳之科而復勒石以旌之
宋之選將也有論策弓馬之殊而復舉劍以援
之宜埽烽燧於邊廷執渠魁于絕塞而名將屢
出良有以也我國家內設國營外分閫帥勲
裔則養之于國學世胄則隸之于衛學所以養
之者豫矣論策以觀其蘊校射以觀其能所以
求之者至矣柰一有所警輒厯當宁拊髀之嘆

豈其中原之無將哉。擇不精而任不專。故也。何
也得于考校者。不過挽強荷戟之粗才。取之廕
襲者。率乃黃口白丁之豎子。指此而擇。固已非
矣。況制從中出。牽于文法之拘。而遷徙無常。苟
且于旦夕之擢。卽此爲任。又豈專乎。嘗鏡諸古
文武兼資。所謂儒將也。吉甫卻縠。其上矣。祭征
虜之雅歌。臨戎羊叔子之輕裘布信。是胡可以
多得也。次則武競而文不足。以才勝者。何能悉
數。第馭之。方在持之。惻者何如耳。有功同而

遲速異者。則漢高之于韓信。光武之于耿弇。是也。蓋三秦未檄。則片言拜相。不爲速。河北徐定。則擾印馳封。不爲遲。亦各從其時也。有法同而操縱殊者。則楚成之于子玉。秦穆之于孟明。是也。蓋違律喪師。非戮之。則何以謝國。而因敗思奮。非釋之。則何以伸仇。亦各有所爲也。閩以外將軍制之。權宜速授也。漢武拜將於八塞。得之矣。而太原未下。宋祖獨援曹彬之賞。非鼓舞之一道乎。不用命者。殺無赦。令宜嚴肅也。光弼斬

將于河陽得之矣。而鄴城未破。王猛獨徇司隸之請。非顛倒之一術乎。不以賊故。弃如穰苴。拔于寒微。衛青起于奴隸。可也不以讒故。易如魏文之信樂羊。唐憲之信裴度。可也。又何拘拘于一決哉。雖然。將固當擇而任矣。而苟非賢相。吾未見其能馭也。是故有蕭何則不患無韓信。有鄧禹則不患無寇恂。師德相而仁傑用矣。富弼相而韓琦范仲淹用矣。不然。胡兒鼓鼙之宣。誰非國忠。武穆金牌之召。誰非秦檜。往事之足爲

殷鑒也。吾故曰：人主之職在論相，相固將之倚
哉。

附選任將材

高皇帝嘗謂中書省臣曰：國家都衛節制方
鎮所任良重，宜於衛指揮中擇其智謀出衆者
任都指揮之職。或二三年至五六年，從上陞擢
毋世襲，著爲令。其後德慶衛舍人倪基上言：「
陛下奉天伐罪，收羅智勇，天下既定，爵爲徹侯。
次亦不失將校，近見握兵於名藩大鎮者多新

進少年忘其祖先勤勞未閑將畧伏望特詔
所司論材薦舉壯烈智勇之士覈寔錄用上

嘉之

命基參贊清平衛軍事

文皇帝諭

兵部臣曰

國家置武衛備暴亂非習兵善撫

士者不可比聞武臣日以晏酣爲樂苟且因循

廢削軍實近倭奴登岸掠居民瀕海官軍猝無

備聞以至奔敗爾兵部其同侯柳升精擇將領

練習戎政者以往仍摘其不職送京師自是

與選者

上必親臨遣

賜鈔錠且給傳行

宣宗五年六部臣請如常事黃福議今天下
都司歲選智勇廉能者一八咨遣至京督府
精加驗覈可大用川之英皇初陝西叅政
年富言其年武臣位高祿重務保爵祿無委身
効職之誼欲求如楊洪等比十無二三乞博求
其人加以優養俟有功擢用因舉都指揮馬麟
李榮可任明年侍郎鄺埜言乞勅內外諸臣
各舉所知隨材委任設有不稱王者連坐明年
勅英公張輔等曰將兵之道莫先智勇必知之

有素然後用得其人。今營操官自都指揮以下
其間有曉暢兵法長撫馭者、智畧優長達權變
者、經歷戰陳敢當先者、膂力過人習武藝者、悉
舉以聞。朕親閱焉。輔等推選紀廣等凡四十
有四人。上以爲將非諸韜畧不可其熟讀五
經百將傳、窅方畧、練武勇、俟試而用之。七年編
修徐瑄上疏曰、今之任將非必有所嘗試、擠掇
以知其短長也。臣竊謂而旋遷都統、三旋遷
總帥、曾無功實、遽登重任、及臨事而敗、計重加

黜爵而前虧已不可贖矣。宜令本兵同一三
勲者從公推舉。初惟以本職參隨鎮帥分領兵
馬。勾攝邊事。果有能也。乃命爲參戎。果有勞也。
然後遷擢。又令本兵移文天下軍衛有司。咨
選籌謀勇力之士。毋分軍民。毋限南北。拘額數
畢舉至。京問攻守之策。較其弓馬及格者。給
糧二石。分隸京營。然後遣隸之總鎮官。參隨效
用有功。授實職。上是其言。又三年大同參將
石亨奏。漢唐以來設謀猷知識絕倫諸科。令人

得各陳所能應詔故趙營平以良家子應募郭
汾陽以武舉自進當時卒藉二人之功自今宜
許其自陳遣邊鎮試驗 景泰初 王師新創
人心稍振起於謙爲本兵任石亨楊洪爲將一
時推選頗爲得人已郎中李賢薦興州千戶王
昱善戰多謀且有忠義勇敢之氣謂達賊可以
計破而不可與戰其計凡數條 詔試而用之
英廟復辟 詔天下舉文武謀勇之士久無至
者七年 令兵部下牒督之於是平江侯陳豫

等舉指揮錢能九人試中者送五軍營 賜鈔

有差 憲廟初都指揮僉事劉清奏天下衛所

舍餘與民間子弟多有謀勇且熟武藝者宜及
時設策召用訓練優養領以忠正廉能武臣別
爲一營侍郎商輅亦言將帥乏人宜于京營及
府衛精加選擇取其體貌魁梧筋力強健諳曉
文墨之人或五十名別擇近地時加訓練以暇
日讀書講方畧而於三營總兵推任一員兼統
之歲一會官考試別爲上中下三等量爲登降

賞罰如此庶才識日有所進而將帥不至乏人
上以爲然又四年樞臣白圭等 上言智勇可

任者若干人間歲復言臣等嘗議令中外文武
臣舉用將材者三卒無應命宜申 令諸臣從

公推舉其後十四年兵部上所舉者名英公張
懋而下舉各若干人命揆選用之時仍具名上
十九年尚書張鵬英公懋會較所舉才畢奏

上曰其如例擢職與軍功等用稱任使顧不干
國有益乎 弘治九年本兵馬文升請廣選舉

而令府部臺省詣別其材所堪具 聞仍會官
考較如武舉例擢用 上然其言三年本兵言
謀臣勇將必待試而後見今團營之制萬人爲
營五十人爲隊隊有長其上有把總有把營總
掌號頭武藝謀勇未必通頭又就中擇其有智
畧達權變者爲將領非職官者試以軍職相兼
而任則智勇之將不待外求 上然之已給事
中蔚春上疏曰臣觀京營中舉以備主帥者大
率皆公侯伯夫封爵以報前功豈必子孫皆可

用也、宜、勅天下今後勿拘流品山林之人、有、足、智、曉、兵、習、占、候、悉、傳、致、京、師、隨、材、錄、用、其、有、才、堪、大、帥、者、則、縣、官、以、禮、聘、之、擢、總、京、營、或、專、大、鎮、迨、有、成、功、賞、及、舉、者、從、之、十、三、年、御、史、胡、希、顏、陳、邊、務、文、臣、舉、楊、一、清、王、質、陳、珍、而、武、臣、則、時、源、姜、漢、朱、鎰、魏、鎮、俱、令、於、大、同、殺、賊、後、二、月、以、虜、入、犯、平、江、伯、陳、銳、總、師、無、功、廷、議、欲、遣、保、國、公、朱、暉、於、是、行、人、王、雄、上、疏、曰、臣、聞、克、敵、之、要、在、乎、將、得、其、人、比、者、曾、不、選、任、而、以、

陳銳今柰何復用朱暉也。夫當樞臣昔會議時
推於衆人之中而獨以銳爲首。陛下亦信而
使之。乃其效若此矣。臣又不審昔所議者何事
毋亦以爲姑循故事耶。抑試之也。彼朱暉者素
不更事。豈遽出陳銳上哉。且惟豪傑能知豪傑
攻之前史舉韓信者。蕭何舉謝玄者。謝安舉高
崇文者。杜黃裳。彼漢晉唐之君。雖未知韓信謝
玄高崇文爲人。而於蕭何謝安杜黃裳三子者
亦旣知之矣。故於所舉直任而不疑。今陛下

卽未真知朱暉爲人果能知舉之者無愧于蕭
何謝安杜黃裳三君子則可若曰未也是豈可
不以陳銳爲前車哉臣愚以爲莫若于邊方都
督中選任夫邊方都督生長北邊其間固有習
知虜情能出奇制勝者特爲主將所羈束不則
監督與提督牽制之雖謀畧無所施耳大會延
臣選於邊方都督之中任大將而勿置監督提
督以撓其權蓋今監督提督卽唐觀軍容使與
監軍也以郭汾陽李光弼將畧而魚朝恩爲使

則九節度之師潰於相州。矧其下者。臣願陛下
下永隆前事。慎擇專任。毋徒以國事爲嘗。疏人
上。謂命將出師國之大事。雄何得妄言沮吾軍。
逮繫詔獄。調遠方縣丞。帶戡其後。乃因兵尚劉
大夏言。召諸居間將領。曾經邊陳者。悉詣
京。付教。縛焉。正德初。兵部請令中外臣各
舉士爲之。期日報可。嘉靖七年。大學士楊一
清言。京營官俱世胄。不足恃宜。召用舊邊將。
如先朝劉大夏指。上納之。勅諭兵部。人材

難得當棄短錄長其給傳令赴闕二十五年本
兵請令兩臺省臣共選舉自指揮而下無論
在告居間具舉之上以簡將用人當加意審
詢毋槩議罷都給事中戴夢桂奏今求將太狹
也論將太嚴也懦將混真也虛文廢武也且趙
秦燕薊其人多勇敢善騎射如盛州王邦直臨
洛李大漢宜益求其比每省可三十人衛可五
人以備器使命以實行隆慶時大學士高拱
請於兵部添設右侍郎二員同額設侍郎協理

部事卒日則練習本部政務或欲巡閱邊務卽以一人往旣便行事又不煩於假借或遇邊方總督員缺卽以一人往旣可朝發夕至又不費於那移迨其出入中外閱歷旣深次第推調尚書員缺如此而猶稱乏用必不然也然兵乃專門之學非人人皆可能宜豫養以待用而法當自兵部司屬始蓋兵部司屬皆與聞軍旅之事而乃不擇其人泛然以用又往往遷爲他官非惟無以備他日之用而目下承行亦有不當者

矣。今宜特高其選。而以有智謀才力者充之。使其專官於此。練習事務。不復他遷。而又議其陞格。如邊方兵備缺。卽以兵部司屬補邊方。巡撫缺。卽以邊方兵備補邊方。總督缺。卽以邊方巡撫補。而總督與在部侍郎時出時入。以候尚書之缺。其他官中有特出之才能知兵事者。又間取一二以補不足。如此而猶稱乏用。必不然也。

歷代國朝馬政

成周以夏官制軍而以大司馬命官其屬有軍司馬
與司馬行司馬其下有公司馬兩司馬其外有都司
馬家司馬皆以馬命官而非出以戎馬定賦則知馬
政之開于六軍至重周之盛時國馬以行軍國公馬
以稱賦周禮鄉師以時辨其馬牛之物縣師辨六畜
車輦之稽遂師遂人以時登其六畜車輦國有戎政
則司馬法甸出長轂一乘牛三頭馬四匹此國馬之
政也其在王馬天子十有二閑而較人掌其政辨六

馬之屬種馬一物以駕玉路戎馬一物以駕戎路齊
馬一物以駕金路道馬一物以駕象路田馬一物以
駕田路駕馬一物以給王宮之百役蓋五良一駕具
辨其德力物色而區分之凡馬八尺以上爲龍七尺
以上爲騊六尺以上爲馬乃其頒良馬而養乘之也
一寄之于人乘馬一師四圉三乘爲皂皂一趣馬三
皂爲繫繫一馭夫六繫爲廐廐一僕夫六廐成較較
有左右蓋馬不乘習將驕憤而不可用不養則屈不
請知馬性而閑其物力雖欲養乘無繇也自乘至廐

積之爲馬二百一十有六匹爲車五十乘是爲卒。易乾爲馬二百一十有六應乾之策也。至六廐成較爲千二百九十六疋。車二百二十乘有奇。分左右較主之則六馬各一廐而王馬小備通左右較良馬一種得四百三十二匹。五種得二千一百六十匹。驚馬三之得千二百九十六匹。通六馬計之凡三千四百五十六匹。而王馬大備蓋周卽民爲兵故軍馬出于民而較人所掌獨給公家之用爲公馬。備十有二閑之制此井田軍賦相表裏之明驗也。天子十有二閑

馬六種邦國六閑馬四種無種戎卿大夫家四閑馬止田駑所以辨降殺爲國防也而凡馬特居四之一一牝足御三牡息馬之道也春祭天駟祈蕃息孟春焚牧中春通溜而執駒夏祭先牧祈克肥而攻特秋祭馬社而臧僕冬祭馬步祈康吉而講馭夫凡軍事物馬而頒之其趣馬則贊較人差擇良馬而齊其飲食簡其進退行止馳驟之六節掌駕脫之頒其四時之居治二月後在牧而有房八月後在廐而有閑趣馬辨之閑師春蠶廐卻溫疫夏治房而蔭之冬馬肥

馬于是有巫馬以養其疾病。相而醫藥之。牧師
牧地爲之厲禁而頒之。庾人掌十有二閑之政。教時
秣飼以阜馬。節駕脫以佚馬。三歲教使服御。曰教馳
馬。二歲攻使無蹄齧。曰攻駢馬。其執駒以竹括押其
耳。串習之。其惡馬綱之。繫維抑其性而用之。及行則
以任輕重。齊其力而行之。禁原蠶。原蠶者。再蠶也。蠶
與龍馬同氣。物莫能兩大。故禁之。成周之重養馬如
此。其詳也。其王馬時不足于用。買之。民有餘賣之。馬
質平之。凡受馬于有司者。書其齒毛。與其賈。馬死則

旬之內更旬之外入馬耳以其物更其外不更諸周
至如此周穆王時有造父者以善御得幸王封之趙
城其後有非子者居猷丘好馬善養息之周孝王召
使主馬于汧渭之間馬大蕃息孝王喜命爲附庸邑
之秦宣王中興內修外攘復文武之竟土修車馬備
械器以田車攻馬同賦焉迨周既東秦襄公以王命
兼有岐雍之地而車鄰鐵駟小戎之詩作並矜其白
顛四牡騤駟騶驪之盛以能勇公戰而力拜兼秦用
盛強春秋時衛爲狄滅文公躬儉勤造邦務財訓農

馬○凡○蓄○息○詩○人○美○之○曰○匪○直○也○人○秉○心○塞○淵○駮○牝○三
千○餘○億○遠○伯○禽○之○法○愛○民○務○農○牧○于○崩○野○馬○以○駟○駟
蓋○有○驕○有○皇○有○驪○有○黃○有○騅○駮○駢○騏○有○驪○駮○駮○銜○有
駮○駮○驪○魚○而○車○以○彭○彭○在○在○繹○繹○祛○祛○也○史○克○頌○之
曰○思○無○邪○思○馬○斯○臧○夫○心○塞○淵○思○無○邪○本○于○心○之○幾
微○而○駮○牝○從○焉○馬○臧○焉○財○焉○作○焉○徂○焉○可○繹○思○也○夫
晉○惠○公○及○秦○戰○于○韓○乘○小○駟○小○駟○鄭○產○也○慶○鄭○曰○古
大○事○必○乘○其○產○生○其○水○土○知○人○心○而○服○習○其○教○惟○所
納○之○無○不○如○志○今○乘○異○產○以○從○戎○及○懼○而○變○將○與○人

易○亂○氣○狡○憤○陰○血○周○作○張○脉○墳○典○外○強○中○乾○進○退○不○
可○周○旋○不○能○君○必○悔○之○不○聽○及○戰○晉○戎○馬○還○淳○而○止○
秦○獲○晉○侯○戰○國○之○際○魏○吳○起○以○言○兵○于○武○侯○武○侯○問○
畜○卒○騎○之○法○起○對○曰○夫○馬○必○安○其○處○所○適○其○水○草○節○
其○飽○饑○冬○則○溫○廐○夏○則○涼○廐○刺○剔○毛○鬣○謹○落○四○下○戢○
其○耳○目○無○令○驚○駭○習○其○馳○逐○閑○其○進○止○然○後○馬○于○人○
親○而○可○使○也○車○騎○之○具○鞍○勒○銜○轡○必○完○堅○凡○馬○不○傷○
于○末○必○傷○于○始○不○傷○于○饑○必○傷○于○飽○日○暮○道○遠○必○數○
上○下○寧○勞○于○人○慎○無○勞○馬○命○力○常○有○餘○以○備○敵○覆○

馬軍制慎之。漢初自天子不能具鈞駟，命民出算賦以備車馬。而太僕以掌輿馬爲官，其屬有六廄，未火家馬三令，有車府、路輪、騎馬、駿馬四令。丞有龍馬、閑駒、橐泉、騊駼、承華五監長丞。馬廄皆萬匹，而馬養于官。又制內郡民養馬，有車騎馬一匹者，復卒三人之算。以爲北軍騎士。至邊塞，則縱民于畜牧，而官不禁。烏氏居塞，則馬數千群。橋、桃居塞，則致馬千匹。置諸苑三十六所，置牧師分布北邊，以郎爲監官，奴婢三萬人養馬三十萬匹。于是衆庶街巷有馬，阡陌之間

成群塞上馬布野而無牧。而文帝又詔太僕見馬遺財足餘皆給傳置以休養之。蓋漢馬之極盛也。其後天子數遣將出擊胡。漢軍士馬死者十數萬。馬大耗乏。乃行一切之令。自封君而下至三百石吏。以差次出馬。天下有亭亭畜字馬。歲課息已。又命民畜牧邊者。得從官假馬。母而歸其息。十一會匈奴。渾邪王來降。天子發車二萬乘逆之。縣官從民贖馬。民或匿馬。馬不具。帝怒。欲斬長安令。右內史黥大憤之。曰。令無罪。獨斬臣。黥民乃肯出馬。且匈奴畔其王而降漢。漢

徐以縣次傳之何至命天下騷動罷中國甘心夷狄
之人乎帝默然罷而峻匿馬者罪有以列侯匿馬坐
腰斬者當是時內郡馬不足籍民馬以補車騎邊郡
不足發酒泉騾駝負載玉門關至輪臺之詔始修馬
復令命無乏武備而郡國二千石各上畜馬方畧補
邊狀與計對吁亦晚矣後漢省約諸苑太僕屬獨未
央廐令一人後置駿令廐別主乘輿馬而伏波將軍
援好騎射受相馬法于成駝楊子阿具表言行大莫
如龍行地莫如馬馬甲兵之本國之大用也安寧以

別尊卑之序有變以濟遠近之難臣嘗受相馬骨法
考之事輒效欲形之于生馬則骨法難備具又不可
以傳後武帝時善相馬者東門京鑄銅馬獻之詔立
之宮門因名金馬門臣謹依儀氏韉中泉氏口齒喻
氏唇髻丁氏身中備一家骨相以其法鑄之爲馬儀
式詔置之宣德殿下爲名馬式焉唐與當周隋之亂
種馬乏得突厥馬二千鳩括殘騎于赤岸澤得隋馬
三千徙之隴右命太僕卿張萬歲領之其屬有牧監
副監歲列職課功而監牧之制始此又尚乘掌天子

之御左右六閑曰飛黃曰吉良曰龍媒曰騊駼曰騊駼曰騊駼
騊駼曰天苑總十有二閑爲二廐曰祥麟曰鳳苑繫飼
之其後又置飛龍廐于禁中而萬歲能其職自貞觀
至麟德四十年間馬大息至七十餘萬置八坊于岐
幽涇寧間地廣千里爲出千二百三十頃募民耕以
給芻秣後頗分爲四十八監地猶狹不能容乃析布
河西廣饒之野牧馬片監牧馬五千爲上三千爲中
不及者爲下監皆有左右皆因地爲之名方是時天
下以一縑易一馬而萬歲掌馬又恩信行于隴右後

又立四使統諸坊設八監于鹽州三監于嵐州凡太
師發牧馬先強壯不足取其次錄物色膚第印記主
名送軍會其數上之省其後萬歲廢而馬衰至開元
初益耗乃命王毛仲領內外閑廐專其事詔州縣言
曩以馬定里過軍旅之復役百姓畏苦自今諸州驛
郵征行定戶等無以馬爲貴民乃稍畜馬毛仲亦能
于職其始官時馬僅萬匹至十三年乃四十三萬匹
帝東封毛仲以馬從辨物色爲群望之如雲錦天子
大喜加毛仲開府儀同三司又突厥款塞玄宗厚

之歲許以朔方互市以金帛市馬于河東朔方左右
牧之馬雜胡種乃益壯其後諸軍戰馬動萬計而五
侯將相外戚牛駝羊馬布收諸道者百倍于縣官別
將較亦各以其私備馬而馬又盛天子因之以弱西
北蕃又後安祿山以內外開府都使兼知樓煩監選
其良聚之范陽故兵力雄天下而遂反自是邊無重
兵吐蕃陷隴右而苑監所畜馬皆沒歲市吐蕃馬皆
疥脊薄蹄不可用代宗欲親擊虜用魚朝恩畫至大
括城中百官士庶馬以共憲宗伐蔡命中使以絹萬

匹市馬于河曲蓋其衰也朱初立左右飛龍二院各
置使分掌之而諸州監牧並廢馬不孳息于是始置
養馬務爲牧圉之地分遣中使詣邊州歲市馬而閑
廐馬始備及平太原得汾晉燕薊馬四萬二千匹而
國馬乃益多始擇諸州曠莽善水草地分置牧龍坊
牧養之景德中改爲監立牧監賞罰命其收市戎馬
戎馬至總數十百匹爲一券馬給錢千給芻粟續食
至京師有司售之分隸于諸監曰券馬其邊州置場
市蕃漢馬團綱送赴闕或就配諸軍曰省馬後言者

謂○戎○人○得○錢○銷○爲○兵○乃○以○布○帛○茶○及○他○物○易○之○初○歲○
市○馬○僅○五○千○餘○匹○天○聖○中○蕃○部○省○馬○至○三○萬○餘○匹○原○
滑○德○順○秦○亦○稱○是○國○子○博○士○李○覺○言○冀○北○燕○代○馬○之○
所○生○胡○戎○之○所○恃○也○議○者○以○制○敵○之○道○兵○騎○爲○急○欲○
啗○戎○以○利○使○重○譯○而○致○馬○然○市○馬○之○費○歲○益○而○廩○牧○
之○數○不○加○多○者○則○失○其○生○息○之○理○故○也○且○戎○人○畜○牧○
逐○水○草○而○轉○徙○騰○駒○遊○牝○順○其○物○性○故○馬○以○蕃○滋○其○
市○之○中○國○則○繫○之○維○之○以○枯○索○飼○之○離○折○牝○牡○失○其○
生○性○馬○甫○至○而○玄○黃○虺○隤○久○益○減○耗○固○其○理○也○古○川○

賦出馬。漢唐之盛，馬阡陌成群，皆取諸中國而用之。不聞取之戎也。今軍伍中牝馬甚多，而孳息鮮者，給芻秣之費不克，而養馬之卒有害無利，駒子生，驅命歟，灰而死，故也。今計度國家所市戎馬之直，匹不下二十千，往來資給，賜予乃在其外。是貴市之外夷而賤棄之中國，非計之得也。國家縱未暇別擇牝馬，以分畜牧，宜且減市馬之半，直爲畜駒，將卒之月給，俟納馬而止，則貸不闕出于國，而馬庶有滋。帝曰：善。非久以費廣而罷，迨元昊發難，國馬不足，乃大括京畿

京西淮南陝西馬以克邊。匿者罪。淳化景德間牧地
自畿甸及近郡內外坊監總六萬八千頃。諸軍班又
三萬九百頃。至和中歐陽文忠公修爲群牧使。言今
馬政皆因唐而馬息耗與唐異者其利病甚懸難可
殫舉也。唐牧地于馬性相宜。西起隴右金城平涼天
水外薄河曲之野。內則岐嶺涇寧東接銀夏。又東至
于樓煩。此唐牧監地也。今或陷夷狄。或爲民田。皆不
可復。惟河東路石嵐之間多山。汾河之側廣水草。以
往迹推之。則樓煩元池天池三監之地。宜尚可得復。

也。臣往奉使河東，嘗行威勝以東及遼州、平定軍，見其不耕之地，往往而是。其山川深繆，地高寒，宜馬。及

京西、唐汝之間，地頗荒曠，可牧。請下河東京西轉運司，博訪地饒水草，可興置監牧者，以聞而不可馬。諸牧監宜可罷。天子下其奏，行相度。至治平中，天下應在馬凡十五萬三千六百有奇。熙寧新法，散國馬于編戶。開封府及五路保甲中戶養馬一匹，其貲力高願養二匹者，聽皆給以監牧。見馬或官與直，命自市。府界馬，馬母過三千匹，五路無過五千匹。追胥外，秀

越三百里者。罰在府界者免。體量草二百五十束。加給錢布五路。歲免其折變絲納錢三等以上十戶爲保。四等以下十戶爲社。保戶馬斃。馬戶獨償之。社戶馬斃。社戶半償之。歲閱其肥瘠。而監苑地咸賦之于民。文潞公彥博言。漢唐之盛。苑監實繁。祖宗修舉甚盛。十百年蒐補取用。源源不絕也。今不深究本末。欲賦地與農。歛其租課。散國馬于編戶。責其孳息。卽不知所賦之地。肥瘠皆可耕乎。所歛租賦。豐凶皆可得乎。復不知戶配一馬。繫之維之。馬可得蕃乎。馬不蕃。

息後將何繼乎。請下中書樞密院較利害博議。上持不聽。竟廢監牧而言利者乘之。始以增廣賦入爲務。請廣增淤田之課。嚴侵冒之科。雖利入稍繁而馬始闕矣。未幾用提舉蔡確言。增開封府界戶馬數而罷給錢布。歲止免輸藁百五十束。民滋失利。又廢監初。愚民利一時得請地而不虞其後。爭立高課計租爲錢已而皆不酬多逋欠。而群牧督運司者日爲峻嚴。卽水旱不蠲。民愈益病。元豐六年提舉河東路保甲王崇極請令本路保甲十分取二以教騎戰。每官給

二十五千令市一馬詔以京東鹽息錢給之令崇寧
月上所買數于是保甲皆兼市馬矣七年京東提刑
霍翔請募民養馬蠲其賦役乃詔京東西路每一都
保養馬五十疋疋給十千又以京東十年京西十五
年而數足置提舉保馬京西呂公雅京東霍翔並領
其事而罷鄉村先以物力養馬之令于是京東西戶
馬更爲保馬矣元祐罷保馬復諸監紹聖後又行給
地牧馬之政迨邊隙開而馬遂大乏靖康初左丞李
綱始追悼祖宗監牧之法廢民間雜養僅以充役官

吏便文苟以塞責宜申復舊制而權行括馬之命以禦虜而汴宋亡矣高宗渡江以來無復國馬紹興二年始命措置馬監後置于饒州以守倅領之擇官田爲牧地復置提舉俄廢四年又置監于臨安之餘杭南蕩上日輔臣進呈廣馬幾似代北所生春秋列國不相通所用之馬皆取于其國中而已申公巫臣使于吳由其射御教吳乘車則是雖吳亦自有馬今必于產馬處求之則是馬政不修也蓋宋初時所市馬分而爲二其一曰戰馬生于西邊強壯濶大可備

陣今宕昌峰貼峽文州所產是也其二曰羈縻馬產于西南諸蠻格尺短小不堪行陣今黎敘等五州軍所產是也羈縻馬每綱五十疋其間良細不過三五疋中等十許疋餘皆不可服乘守或貪于賞格以多爲貴綱遠來或死道路其僅至者但存皮骨茶馬司以其將斃者責付諸路醫之至則隨死而計綱赴江上者又爲押綱卒較竊其芻粟道斃相望舊蕃蠻中馬高下良駑各有定價紹興中張松爲黎倅欲馬溢額以幸賞高其直以市之自是夷欲無厭愈肆邀索

癸巳變故之後、邛部川蠻邀功、越傳始以細茶錦、與之後夷人、常以博馬、茶錦不堪藉口、淳熙中、龔總爲黎守、又與邛部蠻設席于倅廳、副皆犒以酒食、夷人益肆、稍不如欲、則詆訶官吏、牽馬出場、若呂馬僞止三千、淳熙中始增其數、慶元中金人旣爲蒙國所侵、冀之北土遂失、繇是馬綱之司者差罕矣、舊川秦市馬額歲爲萬有一千九百疋、有奇、凡綱馬皆遵陸、乾道初、吳玠爲宣撫使、始議馬綱勞費、又馬房一帶、多峻嶺、亂石、馬多傷蹄、道幾請以舟載、馬而車一如

其請其後言者又謂馬綱所至騷擾江村而商販解之舟尤被其毒况水路馬數較陸行存亡相若至于糴場大有妨碍乃詔川路馬船日下廢罷蓋自建請之後利夔兩路沿江十餘郡之被其害者三載而後得免焉大槩馬政有三牧之于官一也蓄之于民二也市之于戎狄三也宋內有天駟監外有十八監此官馬也民間蓄養指爲外廐此民馬也沿邊算郡估買蕃馬此戎馬也然就是三者論之而監牧爲尤重蓋官之馬多則不專責于民中國之馬多則不

專倚于戎狄。專責于民。則民受其害。專倚于戎狄。則戎狄享其利。累朝于監牧之制。所以必加之意。部輅有方。秣飼以時。騰駒游牝。順其物性。旣置群牧司。又置群牧使。領以大臣。乾德六年。三幸飛龍院。察其孳耗。何其重也。夫惟待之也重。則其視之也亦不輕。而畜牧孳息。自足國用。故民間與蕃落爲市。猶禁之。而黎馬不及格尺。亦收之。不問何者。其所資者輕也。天信。中嘗廢東平監矣。未幾而復置。天聖中嘗廢八監矣。未幾而復議。蓋所重在此。則所輕在彼。此君臣上

下所以必于是拳拳歟。熙寧大臣爲謀不審。聽曾公
寬之說而壞祖宗之制。賦牧地與農民散。國馬于編
戶。坊監廐庫棚房井泉。一旦廢罷。民受其病。官乏其
利。中國不足求之夷狄。于是茶馬之職置矣。吁。市馬
于戎。猶可言也。責馬于民。不可爲也。不然。戶馬之法
罷而茶馬之職至于今。不易。豈無說哉。初時。博易馬
或以銅錢。或以布帛。以錢則戎獲其器。以金帛則戎
獲其用。二者皆非計之得也。熙寧以來。講摘山之利。
得充廐之良。中國得馬。足以爲戎利。戎人得茶。不能

以爲我害彼以食肉飲酪之性所嗜惟茶雖奔風逐
電之駿有所不斬以我蜀產易彼上乘此誠經久之
策者是則始行李杞蒲宗閔分主之其分之者非以
官有其職足以辦事歟其合之者非以人自爲見或
至誤事歟官號都大提舉其職專也名兼三司判官
其權重也官屬自辟謹所擇也官吏可易仲其威也
仲秋爲市四月而止順其時也秦司半歲事訖歸川
順其地也夫惟所創有其人所用有其入設市馬愈
多育至萬匹者茶息益厚有至二萬者吁何其利之

博哉中興以來法度修舉故博馬之司置于紹興之四年威茂之場置于紹興之五年茶馬之官又置于紹興之七年至于乾道川秦兩司凡得九十餘匹內而三衙外而江上咸足其用然後知此制之有益于軍無損于國之爲經久可用也或者猶曰宋公祁嘗請損馬而步田公況亦嘗請步而減騎吾用中國所長而已何以馬爲嗟夫二公所言權宜之說也苟以我所長合夷狄所長不亦萬全之策乎抑猶有說焉有市馬之政有養馬之政養之不至雖市多無益也

嚴監牧之責。逐水草之利。牝馬二萬歲。或萬駒。安得而不繁。夫苟離其牝牡駒。以枯槁是馬。本生性滅矣。何以能育。此正李公覺所謂貴市于外夷而賤棄于中國也。國初設太僕寺于滁洲。後定北都。又設太僕寺于京師。凡兩淮及江南馬政。南太僕寺主之。順天等府暨山東河南馬政。北太僕寺主之。其後用言官言。府州縣添設佐貳官。專民馬之政。在外則設行太僕寺。三苑馬寺。三于山西陝西遼東各轄六監。二十四苑。惟遼東一監二苑。苑咸置卿貳焉。凡馬政。

曰民牧曰衛牧曰京府寄牧凡牧地曰草場曰荒地
曰熟地嚴其禁命而封表之凡牧人曰恩軍曰隊軍
曰改編軍曰充發軍曰召募曰抽選軍皆藉而食之
凡民牧人視其丁產而授馬其種馬牡十二牝十八
牝牝五歲而徵駒曰備用馬齊其馬力以給邊邊馬
足則寄牧于畿府而府甸土不宜馬及人民耗者征
馬金凡馬駒十八年而免定頭駒重駒而籍之報駒
有常期凡馬肥瘠登耗籍其毛齒而時省之三歲寺
卿偕御史二人印烙選其肥良汰其羸劣凡草場歲

徵其租金地畝十七椿朋十災侵出之以佐牧人市馬凡租金有恩蠲及災蠲而馬金則有災蠲無恩蠲卽蠲必轉移相抵不得虧軍賦焉行僕卿職掌于僕卿不與而邊衛營堡府州縣軍民壯騎操馬皆主印烙課率牧而時督察之其衛牧錦衣旗手等衛五軍三千神機等營各設有草場于幾何放牧歲春末夏初各營馬除存留聽用外命生管官一人領下場放牧九月終回營時遣科道官點閱之視馬倒死軍逃亡者則指實覈奏其種馬之數上苑萬匹中苑

七千疋下苑四千疋不及則出幣金及將與幣馬而洮州河州西寧各置茶馬司主之其法以馬茶百斤中馬七十斤下馬五十斤而番族納差發馬萬四千餘匹以爲常洪武初江南人以十戶養一馬江北鳳陽廬滁和戶養一馬上念其不均命江北民增五戶養一馬戶仍給鈔三百貫優之命太僕江南北各有游牝萬匹爲孳生種馬餘悉發草地放牧其飛熊廣武英武三衛牧馬亦如之會言者謂大寧會州山河三衛所屬驛馬皆屯軍牧養軍貧者

衣食且不給。何有于馬。以故歲捐瘠者多。宜命官

覈貧者歸營屯。各選軍士有丁產者以充。從之。

永樂中太僕卿楊砥言。近馬蕃息。牧養乏人。請命

民十五丁養種馬一匹。立群頭一人。五十匹立群長

一人。養馬之家。歲免其根草之半。凡種馬倒死孳生

不及數。俾責償焉。蓋倣宋熙寧保馬法意行之。遂世

爲北方患。上諭兵部言。朔方馬本土宜。亦其人習

畜牧而然。今韃官居間者多。可廉選其忠謹者。命教

民畜牧孳息焉。會六師歲出。擊胡責歲。爲急。軍民

至有鬻子女莫能存者

仁宗聞大痛之命官

爲贖還且寬責駒之命時兵部尚書李慶言民馬益

蕃散之衛伍操用餘千群今遠近方面朝覲官咸

集請員給馬一匹命太僕歲徵駒如民間稍寬民

下廷議報可大學士士奇入力陳其不可曰朝廷

以禮徵賢者投方面郡守次者百執事今役之牧馬

云蘇民困何其貴民而賤官也且馬豈官所宜牧又

賤官貴馬矣上曰慶幾誤朕少選卽批罷居兩月

未下士奇復請曰日陛下許臣罷給馬之令今中

輟何也此 命行天下懷才抱德者望望然去矣且

馬死責償將人皆破家爲子孫憂况所散馬僅三千
頭而今 朝廷負此名于天下此其失非小幸立斷

上曰朕偶忘之行批矣無何 上御思善門 召士

奇曰內批豈誠忘之昨卿言未脫口慶等已噴有忿
言朕念卿孤立故持之今有名矣因出陝西按察使

陳智章示之智疏言按察使所以肅庶官貞百度而

太僕寺得臨之歲徵駒與下民等將憲綱掃地于是
止散馬之命士奇頓首曰昔人言 陛下知臣臣不

孤矣。宣德中太僕寺請遣官覈馬。上召諭曰。馬畜于民。必寬民力而後責之。馬。國家法有定科。屢下命。孳生不及數者。免償。念不欲以馬故傷民。夫農終歲勤勞。營衣食不給。而必責其償馬。何痛如之。爾等其謹率舊典從事。而恤貧難民。宜從寬厚焉。成化中河南兩直隸旱。詔免今歲比較孳生馬時承平既久。馬漸爲民困。而丘文莊濬論北人苦民馬之害曰。漢人馬牧于民。而川于官。唐人馬牧于官。而給于民。至宋始畜之官。復畜之民。又其後市之戎。我

朝修飾而兼用之兩京畿河南山東牧之民卽宋人
戶馬之命也山陝遼東牧之官卽唐人監牧之制也
而川陝茶馬之設抑又市于夷然監牧之法宋人行
之內地而今則用之邊方其蕃育生息旣徒名無實
業不能如徃古之盛矣乃惟馬之用而止害固未及
于民也今內地編戶養馬之弊殆甚于熙寧宋養馬
自願者聽且免其體量草束及折變納錢今則計丁
養馬及數者與之不及者取足諸他戶不問其願與
否也他糧輸戶躐身役一切如故于是有質妻易子

以饋馬。遺諸者矣。且馬散于民戶。丁分日而飼之。分
次而牧之。委之以老稚。食之以蕪穢。而處之于穢污。
馬安得而不斃。一馬斃已。他馬益又斃。孳生俵已。嗣
歲又復俵。生者歲表而供之者愈難。死者日繼而償
之者無已。民安得而不窮。且盜也。况徐淮而南。馬薄
脊而脆。蹄卽其上。乘曾不當冀方之中乘。而道途芻
秣轉輸之費。未論也。于是歛民馬之直。以賈之北。又
計其道里時日芻茭之費。而將之。蓋有賦南馬三。而
僅輸北馬之一。不啻也。故民苦戶馬最甚。夫使百姓

竭力破產以供馬而官得其用猶可言也。今所養馬率羸劣之下乘使馳逐數十里然且頓憊况望其出塞禦虜乎。以下劣之乘而禦虜是遺之禽罔不如不乘之愈也。久之詔覈霸州草場太僕卿儲璫言

陛下興修馬政從群議雖仁壽宮皇莊壽王府

莊亦宛轉上白退還團營放牧誠顧念遠大而不以微利故傷國計也。臣前往霸州丈量時見工部遣官踏勘曩草場廢弛時渾河橫流散漫淤漲葦箔族生放牧不到其時言利之臣因其土之所產而稅之亦

一時之權利而可矣。今既漂窶，又復空理，是重稅之也。夫羣筍等用較之放牧，孰急？況草場設自永樂初，羣筍等課自近年始耳。其地卽草場之地也。又況渾河改徙，不生羣筍，寧復有可征之稅哉？幸上除豁其牧地，乞在所出榜開寫頃畝，有侵占者聽舉首以杜弊源。仍申奏討之禁。弘治中，兵部書馬文升言：「國初中外衛所各有放牧草場，而在京師不下數千餘頃。夏秋收放郊坰，冬春支料喂飼而後馬壯可用也。今無慮爲親藩勢要所占，間爲軍民冒。」

耕馬無所芻牧。入場未一二月，卽往西山中四散。赴牧而調用騎操，輒無馬可給。宜清查便軍，于是命給事中御史并戶兵二部官清查草場。未墾處仍舊牧放，已墾成田者計畝收銀發太僕寺寄庫候買馬爲著令。當是時，陝西牧馬草場止存六萬六千頃，有奇。養馬軍止七百名，有奇。牧養馬止二千八百匹，有奇。而馬政大壞。都御史楊一清講故典，興復之。奏黜卿寺不職者而簡布按二司叅政副使薦補卿少卿絃轍大更。于是六苑地清，復草場十二萬八千頃。

有奇清勾撥補召募收緝養馬軍二千三百名有奇
給買茶易孳生馬并駒凡萬有千八百匹有奇修馬
營城堡十有九處創復衙門倉廩馬廐室宇四千一
百餘所其西寧洮河三衛茶馬法久弛自弘治十
年至十五年止易馬五千四十三疋而邊馬不足邊
軍困于買馬一清奏復金牌舊制禁私販積官茶四
年間共易馬萬九千七十餘匹而茶尚積四十五萬
餘斤靈州大小鹽池增課引五萬九千有奇引納銀
貳錢伍分及臥引銀一錢計爲銀二萬七百六十兩

有奇貯慶陽固原庫以給買馬。于是定開城安定爲上苑。廣寧爲中苑。清平爲小苑。大都通六苑。除歲給軍騎操外。可常牧馬三萬二千五百匹。足支陝西三邊之用。茶易番馬。給軍固濟邊。而風土異宜。孳牧難。遂養馬軍患之。請收買內地馬。不虧其直。而爲串習。水土宜可使息蕃。當是時。草場地復牧。軍數增。城堡相望。苑廐羅列。稽考孳生之法。甚設邊馬歲俵給甚。義而邊以大紓一清懼後無專官復圯也。正德初。具疏言陝西延綏甘肅皆防胡重鎮。軍務所急。莫先。

于馬頃自胡塵弗靖戰馬乏常蒙
采納廷議專設風憲重臣督理馬政臣以唐虞
任使隨命兼理茶法廢陞既久事難更所盡臣之
心不敢有遺慮竭臣之才不敢有遺力組皆就緒則
責任專而事易集也自兼巡撫以來顧此失彼已不
如前復蒙加任總制經理邊方責任重大于監牧茶
馬之政勢不能復及矣切惟先年兩寺馬政巡撫兼
管而巡茶御史實主茶馬巡撫政事繁多以致茶馬
所易良駑莫究操騎所給登耗莫聞本未始終蒞不

相○攝○亦○勢○使○然○也○夫○茶○司○之○所○易○卽○監○苑○之○所○牧○監○
苑○之○所○牧○卽○官○軍○之○所○給○本○爲○一○事○伏○乞○仍○設○巡○茶○
御○史○務○選○年○深○老○練○實○心○幹○事○之○人○以○充○仍○勅○兼○
理○馬○政○行○太○僕○苑○馬○等○官○專○聽○提○調○約○束○各○衙○門○毋○
與○庶○幾○事○得○專○理○可○責○成○功○于○是○巡○茶○御○史○兼○馬○政○
實○始○此○嘉○靖○中○詔○本○兵○言○順○天○府○屬○故○論○地○養○
馬○近○年○牧○地○外○歸○豪○右○而○馬○疲○死○責○養○馬○者○償○應○天○
府○屬○故○論○丁○養○馬○近○駒○馬○止○解○馬○直○而○種○馬○倒○失○復○
命○民○買○補○民○困○甚○其○議○措○處○以○聞○列○聖○恩○厚○下○

如此給事中謝汝儀條京衛下場之害言京衛軍歲
春夏于幾旬下場放牧歲一舉行而草場地土爲勢
要奏討姦人投獻者殆盡獨低窪處又積爲湖淀漫
生萑葦人馬皆不可近又無廬次可以棲止無廐房
可以蔽蓋馬買草而喂人裹糧以從軍士逃亡馬匹
倒死雖有下場之名殊無收放之實蓋法弊極矣近
襄城伯李全禮奉敕領下場馬二千餘匹收放隨
又以聽征馬六千益之馬以萬計芻牧無所矧今大
雨時行暑氣方溽泥潦遍野鬱蒸中人群處則有疫

病之虞。露宿則有蟲蛇之苦。人困馬病。是徒徇節省之名。而坐受虧損之害也。萬一畿甸有桴鼓之警。邊關有烽火之報。將胡以待之。乞勅兵部會同坐營官熟計其便。將聽征馬責軍人就近便牧放。月給半料。其可無下場而巡撫蘇松等處翁大立條江南養種馬之害言我太祖定鼎金陵。以郊圻之內。不可缺馬。而大江之南。不便養馬。設僕寺于滁陽。領牧而應天等府。每十一戶止養馬一匹。又給牧地。免差徭寬之。永樂中始計丁養馬。成化中又官收地。

弘治中以江北水荒馬害養江南府甚夥而
民困漸極國初論丁養馬丁不編徭邇來人戶逃
亡槩派丁田出辦而單丁下戶亦不免馬害一馬頭
中另編群長歲歛貼戶銀三十兩群長外又編獸醫
歲歛藥餌銀十三兩害二官徵地租畝無隙地求收
與芻而不得又歲派草料銀四五六兩害三江南地
甲而馬性惡濕歲倒損什二三問罪賠償又不下二
十兩每季印烙官有常例吏胥里老有紙劄供應害
五寺備用馬匹費銀三十兩赴南部者匹五十兩

解赴京者倍之害六况水旱頻仍海防愈急民有菜
色而望雲錦之成群人齧草根而欲芻秣常給何可
得也今若革之民間歲省群長貼戶銀及獸醫工食
八千餘兩省草料點烙罪贖賠償銀十有二萬餘兩
又歲省管馬通判主簿俸錢薪馬費數百兩種馬一
匹倣通州例徵銀二十兩官可得銀一十九萬九千
餘兩而借用馬匹牧地子粒銀初不以革種馬少損
也爲利已不訾矣且沿海護塘之外皆鐵板沙塗馬
可馳驟今選種馬堪戰者千餘匹分給總兵參遊

總等領之則倭奴之犀捨利亦不足當國之輕騎蹠足裸形不足當國之勁鏃有舟師截之海又有騎士拒之邊地利旣得長技在我併以蘇松糧長所辦馬絲之有餘以供走遞于爲利豈有量哉于是都御史王廷相條馬政三事言團營馬匹存操者自四月至九月有料而無草其下場者料草皆不支惟十月入操後至三月止皆全給料而給草者僅三月餘折銀月一錢二分通一年計之存操之馬有料而無草者凡九月是料備而草不足下場之馬僅得半年之料

而草與料俱不足也。夫馬給于官，固非已物而自備。草料則切身之苦也。雖家枵腹實然，且難之。况實貧難自給，不服而驟及公家之畜哉？在營之馬，日飢而死，此其故非難知也。而部猶以舊例格之。祖宗來諸司例變者亦多矣。卽如下場之馬，弘治前尚隨場放牧。今草場半爲田，而納租銀矣。營馬隨便牧放，不干郊矣。獨牧馬之資，猶執下場寄牧之例，何名實之相背也？官以非事例而不肯給軍，軍以非已物而不肯飼馬，則日俟其斃而已矣。且一馬之價，小民解

依無慮費三四十金。乃吝此數月草料。而必致之死。是所惜者小。而所失者數十百倍之多也。蓋掌馬者計不及財。掌財者慮不在馬。誠令如一家之事。而圖之。則草場馬匹。事皆切心。豈有惜纖微之費。而傷數十金之馬者哉。乞存操下場馬。通融放給。而舉草場租銀。補營馬草料不敷之用。且也馬之給領。非必軍之殷實者也。軍殷實者。通賄自免。而領馬養者。類責之貧軍。夫此貧軍。賃房而居。待糧而食。賃房則馬必無棲露地以居。雨雪不蔽。而馬苦矣。待糧則食必無。

餘開支折色僅給口實而馬飢矣馬苦且飢而啖之
酒糟氣烈味惡不作膳而損力雖強壯之馬數月之
後必且羸病無所用之乞將團營軍審實其力以領
馬而擇其馬無膳者會飼驗視之國家于馬政日
孳牧日解俵日給允補負而馬日不足者飼秣之實
未盡耗失之計不明地產之宜不辨生養之源不開
也一兵受賜舉家乘之至有以載薪芻者矣一將王
兵衆禪役之至有以供迎送者矣當事者又以芻蕘
之不備而分之金金受之商人曰兵自易也金人兵

手執不安用有傾囊索易芻蕘者○
秋毫兵見小利有不以他貨相買賣者○
此芻秣之實不盡也○家市之馬失者不深罪○官市之
馬失者不深罪○關兌之馬失者又不深罪○是不明馬
所從來也○從戰六七歲失者不深罪○卽三四歲或一
二歲失者又不深罪○是不明馬所爲役也○瘟疫斃者
驅厄汗喘斃者○馳疾癰疥斃者○櫪穢而羸瘠斃者○失
秣也○皆冥其故而莫省○奸人戕馬以避戰○有稱半道
而馬斃者○矣○懦將棄馬以餌敵○有稱馬斃歸伍而全

身者矣。是不明馬所從路也。此耗失之料不明也。夫古司馬法。甸出長轂。鄉師縣師。惟辨其物。登其數。時稽之而已。其養于民者。官無所與也。至較人牧圉之所養。教養攻執。差擇以至于閑庠牧地。皆官自計度。未嘗關諸民。國家苑馬之設。固養于官之遺意。而于兩直隸河南山東編民戶以養馬。月給錢而畀之。終已不得其用。官益多事而民乃甚病。此其養之所自生耳。夫天下非小弱也。古往所宜馬之。盡然而有也。隴右金城岐幽涿寧。唐人監牧之遺。在也。而

貴代最產馬爲 帝畿中原平曠一望萑葦夫孰非
牧地者春秋魯衛漢唐全盛時嘗用之矣誠令責卿
監通知馬政者勘實牧圉諸西北宜馬之鄉山林原
隰民棄不耕者並置苑囿而廣畜之北宇順其時騰
放調養盡其道而以周官月令之法悉心理之有唐
牧監之盛固可生而致也嘗攷 漢武初制令有司
提調孳牧江南十一戶共養馬一匹江北五戶共養
馬一匹以丁多之家爲馬頭專養一馬餘令津貼以
備倒失買補每二歲納駒一匹又立群頭群長設官

鑄印與守令分民而治有牧馬草場又免其根草之
半每家優卹使有司能責實而行之常使民得養馬
之利則馬亦何憂不蕃也今顧不能修其舊而徒以
法之弊而亟變之則天下安得有善法夫令民養馬
國家之意本欲得馬而已而有所謂本色折色何爲
也責民以養馬而又責其輸銀如此則取其銀可矣
而又何以馬爲于是民不以養馬爲意而以輸銀爲
急矣牧地本爲民養馬也而徵其子粒又常以增
如此則遂併之田租而已而又何所徵之也

是民不以養馬爲意。而又以輸子粒爲急矣。養馬者課其駒可也。不用其駒而使之買俵。于是民不以養馬爲意。而以買俵爲急矣。夫折色之議。本因江南非產馬之地。變而通之。雖易銀可也。遂移之于河北。今又變賣種馬。而徵其草料。原今變者之意。專欲責民之輸銀。而非責民之養馬也。官旣無事于養馬。而獨規目前之利。民復恣爲姦僞。而爲利己之圖。有駒不報。而攻于欺隱。不肯以駒爲用。而獨願以銀買俵。至或戕其孕字。絕其游牝。上下交征利。以相欺而已。安

望于馬之蕃息乎。今之議者又方日出新意以變賣
馬之半爲未盡。因欲盡賣種馬而惟以折色徵解畧
不思祖宗立法之深意。可用太息也。夫河北之人
號健良馬。冀之所產。今舉冀良產盡棄之一旦國
家有事。西邊之馬。可得以爲畿內用乎。古語曰。變而
不如前易。而多所敗者。亦不可不復也。今欲講問馬
政。必盡復。洪武永樂之舊。江南折色可也。畿輔
河南山東之折色不可也。草場之舊額可清也。子粒
不可徵也。官吏之侵漁可黜可懲也。而管馬官群兵

獸醫不可省也。行馬復之。令使民得寬其力。民知養馬之利。則雖官馬亦以爲已馬矣。又修金牌之制。通關互市。益得好馬。別賦之民。以爲種馬。而有司加督視之。洪武永樂之舊。猶可復也。蓋修茶馬而渥注之產至矣。弛草地而牧之息繁矣。卹編戶忒芻牧而烏僇橋姚之富臻矣。故曰車騎天下之武備也。其所以壯神京防後患。豈淺淺哉。雖然。兩京太僕寺與遼陝肅代諸行太僕寺若苑馬寺。此產馬之處也。源也。九邊列鎮與紫荆居庸山海鴈門偏頭寧武

諸關諸兩京營塲此用馬之處也流也源深流遠世
覽鏡之矣故法數馬科駒之外則有若朋椿之協相
有若皮椿之罰懲有若巡清歲季之督課至私顧賃
載負必實之法所以節其流而濬其源也今陵遲盡
矣綠邊牧地乾沒于風沙占沒于豪右虜入無時卽
盛夏且嚴烽燧法四月下塲十月給芻皆不可行兼
騎卒貧窘率縮芻菽之直以自食其甚者往往利馬
之死避調戍否亦終歲道路踣斃相望矧乎西北東
南之殊風水土蒸粘之異致皆弗暇論也本兵用

固亦分邊腹遠近曾否習貫也至馬顧可漫然已哉
嗟夫今士大夫爭言括財不暇言理財言理財不暇
言生財至如馬固財之大且亟者也又非旬月晦朔
之所能攻開壯長也原之弗濬流之無節斯何異竭
溝塗澮川之漑以供尾閭之泄耶矧民慮官府抑配
與其俵輸率無敢私畜牧者是并其原之傍出者又
從而湮塞之矣夫雲錦之盛匪降自天淵塞之心奚
獨在古故夫重岡寺之權慎牧卿之遜復川陝馬政
都憲之舊久其仕而綜覈其成殿最之要誠在所急

卷二十一

卷二十一

哉

三

歷代國朝車戰

聞之以步兵戰者不足以勝騎以其善馳突也以騎
兵戰者不足以勝車以其善捍禦也古之戰者必以
車自夏啓誓御馬以正而勝有扈周文王以戎車既
駕而服玃狁則車戰其所繇來久矣厥後牧野之會
革車三百兩當時與太公論車戰爲詳如六韜所記
武王問于太公曰以車與騎步所當幾何公曰車者
軍之羽翼也所以陷堅陣要強敵遮北走也易戰之
法一車當步卒八十人八十人當一車一車當六騎

古今治平畧

歷代車馬

卷二十七

二

六騎當一車十乘敗千人百乘敗萬人此其大數也
置車之吏數五車而一長十車而一吏五十車而一
卒百乘而一將易戰之法五陣爲列前後相去四十
步左右十步險戰之法車必循道十里爲聚二十車
爲一前後相去二十步左右六步隊間三十六步五
車一長縱橫相去一里各返故道選車士之法取年
四十以下長七八五寸已上走能逐奔馬及馳而乘
之前後左右上下周旋能束縛旌旗力穀八石弩射
前後皆便習者武車之士不可不厚也車戰之速

車之死地有十其勝地有八從面無以還者車之死
地也越絕險阻乘敵遠行者車之竭地也前易後險
者車之困地也陷之險阻而難出者車之絕地也北
下漸澤黑土粘塗者車之勞地也左險右易上陵下
阪者車之逆地也殷草橫訛犯歷深澤者車之拂地
也車少地易與步不敵者車之敗地也後有溝瀆左
有深水右有險阪者車之壞地也日夜霖雨旬日不
止道路潰陷前不能進後不能解者車之陷地也此
十者車之死地也敵之前行陣未定卽陷之旌旗擾

亂人馬數動卽陷之士卒前後相顧前往而疑後恐而怯卽陷之三軍卒驚皆薄而起卽陷之戰于易地暮不能解卽陷之遠行而暮舍三軍恐懼卽陷之此八者軍之勝地也至其巾車掌五戎之正則革路龍勒條綴五就建大白以卽戎以封四衛而車僕掌五戎之副則有戎路之萃及廣車闕車萃車輕車各以其萃蓋車戰之法每車甲士三十六步卒七十二人以二十四人居前左右各二十人居前左右者戰左三三挾轂常相更番後又二十五人爲一隊三車三三

步所謂炊家子守衣裝廝養樵汲者也。行則以車爲衛，止則以車爲營。一車一閒，又有倅車以脩不測，所爲不可敗之道也。嗣是宣王以其車三千威荆蠻，魯僖以戎車孔博服淮夷。衛文公元年，革車三十乘。季年乃三百乘。宋華元甲車四百六十乘。晉城濮之戰，車七百乘。鞮鞢鞅鞞邲之戰，楚子爲乘廣三十乘，分爲左右。廣鷄鳴而駕，日中而說。左則受之日入而說。許偃御右，廣養田基爲右，彭名御左，廣屈蕩爲右。周伐鄭，鄭爲魚麗之陣，先偏後伍，伍承彌縫。晉申公巫

臣使于吳以兩之卒適吳舍偏兩之一焉與其射御
教吳乘車教之戰陣教之叛楚寘其子狐庸焉使爲
行人于吳孫吳得通于上國此皆用車而制勝也
惟隱公九年北戎侵鄭鄭伯禦之患戎師曰彼徒我
車懼其侵軼我也公子突因請爲三覆以待之卒殪
戊師昭公元年晉中行穆子敗無終及群狄于太原
崇卒也將戰魏舒曰彼徒我車所遇又阨以什其車
必克困諸阨又克謂皆卒自我始乃毀車以爲行五
乘爲三位荀吳之嬖人不肯卽卒斬以徇爲五陳

相離兩于前、伍于後、專爲右角、參爲左角、偏爲前拒、以誘之、翟人笑之、未陳而薄之、大敗之、自是而後、車戰漸廢、蓋古者之用兵也、險野人爲主、易野車爲主、則險野非不用車、而主于人、易野非不用人、而主于車、車之于戰、動則足以衝突、止則足以營衛、將卒有所託、兵械衣裘有所資、詩曰：君子所依，小人所腓。則車之利大矣。考之周禮：五伍爲兩，四兩爲卒。司馬法：二十五人爲兩，百人爲卒。兩則人也，偏則車也。大槩十五乘爲大偏，九乘爲小偏。其尤大者，又有二十五

乘之偏、周、魚、麗之偏、二十五乘之偏也、楚二廣之偏、十五乘之偏也、巫臣所舍之偏、九乘之偏也、先偏後伍、伍從其偏也、卒偏之兩、兩從其偏也、先其車足以當敵、後其人足以待變、則古者車戰之法畧可知也、且以車戰、其坐作進退整暇有法、未嘗掩人之不備、而以奇取勝也、故韓厥遇齊侯、則奉觴加璧、郤至遇楚子、則免胄趨風、可以死、則爲于犇之請、矢可以無死、則爲庾公之叩輪、所謂殺人之中、又有禮焉、雖春秋伯國之君臣、其志在于爭城爭地、然于勦敵之人、

初不迫于險固如此。至戎狄之侵中國。則雲合鳥聚。輕進易退。于是車之雍容不足當其徒之慄疾。遂至舍車而用徒。然彼長于車。今捨吾之長技而與之搏。是以兵予敵也。故必設覆以誘之。未陳而薄之。然後可以取勝。而車戰之法廢矣。戰國以來。乃用騎兵。而車猶有間見者。至漢夏侯嬰破李繇軍于雍。兵以兵。車趣戰疾破之。灌嬰以御史大夫將車騎。別追項籍。至東城破之。武帝時。衛青軍出擊匈奴。以武國車自環爲營。而縱五千騎往當匈奴。李陵對單于亦以六

車爲營引士出營外爲陳連戰此車之用于西都者也。後漢光武造戰車可駕數牛止作樓櫓置于塞上以拒匈奴。靈帝時陽璇爲零陵太守制車數十乘以禦賊。此車之用于東都者也。曹操新書攻車七十五人守車一隊共二十五人。田豫與虜戰亦用車而陣。孔明尤善于營車。晉馬隆擊鮮卑樹機能以衆數萬據險拒之。隆以山陝隘乃作扁箱車地廣則爲鹿角車營路狹則爲木屋施于車上轉戰而前行千餘里殺傷甚衆。遂平涼州此車之用于魏晉者也。劉裕

南燕以車四千乘爲左右翼方軌徐進與燕兵戰于
臨拘敗之又伐秦假道于魏魏遣軍徼之裕遣白直
隊主丁旡帥仗士七百人車百乘渡北岸去水百餘
步爲卻月陣兩端抱河車置七仗士事畢使豎一白
旄魏人不解其意皆未動劉裕先命寧朔將軍朱超
石戒嚴白旄旣舉超石率二千人馳往赴之賁大努
百張一車益二十人設彭排于轅上魏人圍之超石
以大鎚及稍千餘張禦之魏師奔潰後魏攻鍾離梁
武帝遣韋叡救之魏將軍楊大眼勇冠中軍所向披

靡敵結車爲陣以強弩三千一時俱發殺傷甚衆大
敗却走而魏太武北伐蠕蠕亦用車十五萬兩隋諸
將之與突厥戰也皆戎車步騎相參爲鹿角方陣此
車之用于南北朝者也唐李靖與太宗論兵法曰駐
隊兼車乘而與突厥越險數千里未嘗敢易則唐固
嘗用車矣高宗調露元年裴行儉討突厥阿史得溫
反先時饋糧數爲虜鈔軍餒死行險乃詐爲糧車三
百乘伏壯士五輩賁陌刀勁弩以羸兵挽進又伏精
兵衝其後虜果掠車羸兵走險賊驅就水草解鞍牧

馬方取糧車中而壯士突出代兵至殺獲幾盡自是糧草無敢近者後哥舒翰節度隴右造戰車蒙以狻猊而後馬燧亦爲狻猊車列戟于後行以載兵止則爲陳或塞險阨以遏奔衝器械無不犀利則唐又嘗用車矣獨房琯將兵復兩京至便橋陳濤斜琯效春秋時戰法以牛車二千繫馬步夾之旣戰賊乘風譟牛悉解栗賊縱火焚之人畜大亂官軍死傷者四萬人議者遂以爲用車不若用人與騎之愈抑不知古者車冒以革而琯用水焉幾何而車不見焚古者駕

以駟而琯用牛焉。幾何而牛不憚慄。古者射御必精。而琯則用劉秩將市人焉。幾何其不一敗而塗地。古者教民以射御爲藝。君子以射御爲能。故夫子曰。吾執御乎。執射乎。古人相率以射御如此。切嘗誦詩見其材之良焉。御之精焉。驟服之漸習焉。然後知斯民之習于車果非一日之可能也。三代各有所尚。惟周人獨尚輿。故一器而兼衆才者。車爲多。而有輪有輻以爲之行。有箱有較以爲之安。有軸有轂以爲之利。有矛有矦以爲之建。有旗有常以爲之識。而其詩曰。

小戎伐收五檠梁。斬四牡駢駢。旗旄有翩。言其材之美也。當時士無貴賤。莫不安于乘馳。便于射御。未嘗有鞮而銍鞍。而騎者。其詩曰。叔善射忌。又良馭忌。不失其馳。舍矢如破。言其御之精也。人安于上。輿載于下。轅承于載。馬順夫轅。施之行陣之間。則地輕馬。馬輕車。車輕人人輕。戰而其詩曰。執轡如組。兩驂如舞。蕭蕭馬鳴。悠悠旆旌。言其驂服之漸習也。房琯不習而遽用。能無敗哉。至宋真宗咸平四年。吳淑請復古車戰之法。謂夫人平居。猶必謹藩籬。固關鍵。以備不

虞况當胡虜之戰陳禦突騎之輕剽而無蔽護哉夫
人之被甲鎧所以蔽其身也而戰之用車亦一陳之
甲鎧也且鱗介之虫肌肉在內鱗介在外所以自蔽
而士卒顧可使肌肉居外鱗介反在內乎則戰之用
車亦一陳之鱗介也故用車戰爲便其制取常用車
按其衝軛駕以牛車上置鎗矛外向列士卒于車外
賊至射之乃出騎兵擊之此制虜要術也故可以行
止爲營陣賊至則歛兵附車以拒之賊退則乘勝出
兵以擊之出則藉此爲所歸之地入則以此爲所居

之宅。故人心有依。不懼胡騎之陵突也。仁宗至和二年。韓琦言。郭固就民車。約古制。爲臨陣禦敵。緩急易集。其車前銳。後方。上置七槍。爲前後二拒。增爲重箱。高四尺四寸。用革輓之。琦以爲可用。下平川之地。臨陣以折奔衝。下營以爲寨脚。莫便于此。而時范仲淹上攻戰議。亦言。延慶山坡。大車難進。當用小車。是宋初亦嘗用車也。及神宗時。以北虜將入寇。遣中貴人取兩河民車。爲脩民大驚。援上問沈括曰。卿知籍車之事乎。括曰。車戰之利。載于歷世。但古人所謂輕車。

者○兵○車○也○今○之○民○車○重○大○以○牛○挽○之○日○不○能○行○三○十○里○少○蒙○雨○雪○跬○步○不○進○故○俗○謂○之○太○平○車○恐○兵○間○不○可○用○耳○上○喜○曰○無○人○如○此○語○朕○遂○罷○藉○車○之○令○徽○宗○時○涇○原○邢○恕○建○兵○車○之○議○下○令○創○造○買○牛○以○駕○凡○數○千○乘○已○而○蔡○頌○又○請○河○北○置○五○十○將○兵○器○仍○爲○兵○車○萬○乘○蔡○京○主○其○說○行○之○姦○吏○旁○緣○卽○日○散○行○郡○縣○掠○民○緡○錢○矣○至○崇○寧○三○年○河○北○陝○西○轉○運○皆○奏○兵○車○用○許○念○圭○所○定○式○則○車○大○而○費○多○依○往○年○二○十○將○兵○車○式○輒○小○易○用○復○可○省○費○詔○卒○用○許○彥○圭○式○時○熙○河○轉

運副使李復先奏曰古者師行固嘗用車然井田法廢已久且今之用兵與古不同古者兵不妄加征戰有禮不爲詭遇動皆有法又多在平原易野故車可以行而敵人不敢輕犯今之用兵盡在極邊下寨駐軍各以保險爲利車不能上又戰陣之交一進一退車不能及武爲虜所襲逐車又不及收臣于戎馬之間觀之屢矣乃至糧糗衣服器械猶有不能爲用者而況于車乎聞此議出于許彥圭許彥圭因姚麟上其說朝廷但以麟邊人熟邊事遂然之不知彥圭輕

妄麟立私恩以誤國計昔唐房琯用車戰大敗于陳
濤斜當時在畿邑平地尚如此况今欲用于峻坂溝
谷之間乎且戰車比常車濶六七寸運不合轍昨東
來者牽輓不行致兵夫典賣衣物自賃牛且終日而
進六七里率多逃亡戰車棄于道路未造則有配買
物料顧差夫匠之擾旣成又艱于運致然則其爲諸
路之患其費不知幾千萬矣乞罷造以寬民力其後
彥圭卒得罪觀此則後世之不用于車蓋有繇矣高
宗建炎初宗澤造戰車法運車者十有一執器械輔

車者四十有四每車計五十五人李綱造戰車法以
竿雙輪上設皮籬以捍矢石下施鉄轂以衛人足旁
施鉄索聯可爲營四人推竿以運車一人登車以發
矢二十人執軍器發車之兩旁每車用二十五人其
法竟不及施紹興二年布衣王大智獻車式上命爲
樞密計議官明年車成而不可用罷之上謂輔臣曰
車制雖古然用各有宜况其物料多南方所無且古
人用車亦或不利如膝絙而止之類蓋用車于戰陣
間亦非利器也席益曰古人之戰彼此皆用車至于

彼徒我車已有侵軼之慮而後人每以車敵騎其敗固宜房琯陳濤斜是也蓋自渡江後東南沮洳之區險隘之地不以車爲主也雖然中興之初但爲守計雖不習車可也至其後漸欲進取則不習車不可是必當日符彥卿之拒馬寨如之何而收其效米守信之寨脚車如之何而極其利至則歛兵退則出兵自比于循青必何如田況之言行載甲兵止爲營陣自比于馬燧又何如郭固之式噫出車彭彭旂旐央央獫狁之襄易事也我車旣攻我馬旣同夷狄之不攘

無有也。如徒曰：此唐人房次律覆轍不可用得無因噎而廢食乎？至後魏勝創如意戰車，弩車、砲車，其制上爲獸面目，牌垂羶幕，軟牌每車用二人推轂可蔽五十人行。則載輜重器，甲止則爲營，排搭如城壘，人馬不能近。列陣則如意車在外，以旗蔽障，弩車當陣門，砲車在陣中，兩陣相近則陣間發弓弩箭砲。近陣門則刀斧鎗手突出，交陣則出騎兵，兩向掩擊，拔陣追襲，則少却入陣間，稍憩進退俱利。何便出擊慮有拒遏，預爲解脫。後之言車者，莫便于此。明興戰勝。

攻取威震殊俗至

正統己巳之變邊圉孔亟李賢

上言虜之所以取輕中國者恃其弓馬之強而已臣
觀今日之拒馬木止能拒馬不能避箭挨牌止能避
箭不能拒馬今中國長策惟有所謂戰車若衛青之
武剛車可以禦之而又有取勝之道則火鎗是也論
中國長技無出于此若用得其法虜弗能當夫車製
四圍箴板內藏其人下置銳眼上開小窓長一丈五
尺高六尺五寸前後左右橫排鎗頭每車前後占地
五步若用車一千五輛一面二百五十輛約長四里

欲行則行、欲止則止、謂之有脚之城、內藏軍馬糧草、
輜重、以此禦敵、使馬不得衝陣、箭不得傷人、彼若近、
前、火砲齊發、奇兵繼出、彼若遠、遁、我勢益張、我威益、
振、備邊長策莫善于此。成化十二年、都御史李實、
請造偏箱車五百、輜鹿角柞五百具、相參而用、行則、
爲方陣、止則爲方營。已命工製造、事成、竟以登高、
涉險不便、遂已。十九年、總督宣大余子俊言曰、自古、
命將出師、誅暴禁亂、見可而進、知難而退、進退之間、
非車不可。熟看大同地方、山川平曠、宣府地方一半、

相等門庭寇至車戰爲宜。今爲軍之計大率以萬人爲一軍。戰車五百餘輛。用步軍千人。駕拽行則縱以爲陣。止則橫以爲營。車空缺處用鹿角柞補塞。凡戰士器械不勞馬馱。乾糗不煩自賁。若虜賊合衆對壘。彼用弓矢。止有百步技能。我用鎗砲。動有三四百步威勢。如相持過久。徒將分散搶掠。我則出兵或首遇其驕橫。或尾擊其情歸。前項車營取便策。應運有足之城策。不餉之馬。此億萬年守邊簡易法也。復具圖本甚詳。上可之。遂造戰車數千輛。爲練武圖。以

教士卒然初試之日士卒死者數人卒歸于廢
云而丘文莊著大學衍義言古者車制用四馬駕
之每車用甲士三人步卒之半三人其制太利于
守而不利于行可以行近而不可以行遠行易地則
易而險路則難體制重而轉動爲艱一車之費動至
千百成造亦非一二日可具且人不皆用而我用之
非獨用之戰陣爲難則雖行之大陸通衢亦有所抗
拒者矣今世有小車獨輪無箱民間用以般運一夫
推之或一二人前挽若因其制倣爲戰車一可以戰

二可以前拒。三可以爲營。四可以衝突。五可以載軍。
裝六可以昇病卒。且其費不多千錢以下。可具一車。
中途有損。不用匠而可修。逢險阻則昇以行。遇急難。
則棄而去。大率一車用卒五人。一人推而二人挽。二。
人執兵仗以輔之。凡五人者之食具衣裝皆載其中。
中途有一人病者。則以人昇物。而以車載人。夜則環。
列以爲營。可免士卒每夜立櫺挑塹之擾。言之詳以。
脩矣。後潞安兵副陳大綱。遵其制爲戰車。甚爲簡便。
其上既可以安制兵器。其下又可以載糗糧綴示甲。

障遇險阻。兩人可昇以行。是不惟有資于戰。而又大
利于守。不惟省芻秣之費。而又資餽餉之饒。誠脩禦
之長技也。蓋與虜對壘。則重車疊陣。方軌而行。山移
而進。謂之奮擊。虜衆未集。則衝車直隊。竟刺部落。謂
之衝擊。我衆未集。虜騎忽入。開門則排車橫陣。高壘
厚壁。以奪歸路。謂之要擊。虜衆深入。絡繹連亘。則分
車角陣。縱橫開闔。約號四起。謂之夾擊。虜之還也。旣
有持載。必不能疾行。則輕車夾騎。三道排堵。而尾之。
或夜斫其營。或擾奪其馬。伺便以火器車直擣其輜。

重期以必救然後三道來攻謂之追擊大畧胡虜鉄騎數萬衝突勢銳難當我軍陣伍未定輒爲其所衝破往往乘勢蹂躪至無孑遺且虜欲戰我軍不得不戰虜不欲戰我惟目視而已勢恒在彼故常變客而為主當此之際使有車爲拒兼以長短兵夾輔之則房馬豈能近又或驅車以衝之雖虜馬將退走寧至及其奔突一敗塗地哉故近日戚將軍繼光創立車而江公道昆會題以十座爲額每座戰車一營二十八輛車上安大佛二架每車見派軍士二

十名分爲奇正二隊而烏銳長刀藤牌火箭無不畢
其近陣則迭出制勝以之環衛軍馬一則可以爲部
伍一則可以爲營壁一則可以代甲冑虜馬擁衆無
計可逼誠爲有足之域不秣之馬但所恃全在火器
火器若廢車亦何能獨禦哉